

文獻通考

三百二十四卷


四裔考



内閣文庫	
番號	漢 600
冊數	140 (131)
函號	294 6







通考卷三百二十四

鄱陽馬端臨貴與著

四裔考

社氏通典邊防總序曰覆載之內日月新臨

華夏居土中生物受氣正李淳風云談天者

石氏渾天之類以度數推之則華夏居天地

之中央又歷代史倭國一曰日本在中國直

東扶桑復在倭國之東約去中國三萬里蓋

近於日出處貞觀中骨利幹國獻馬使云其


國在京師西北二萬餘里夜短晝長從天色

今崖州直南水行便風十餘日到赤上國其

國到五月亭午物影却在南一日三食飯皆

蓋去日較近其地漸遠轉寒蓋去日稍遠則

洛陽告城縣土圭居覆載之中明矣唯其人





賢繼施法教隨時拯弊因物利用三五以降  
代有其人君臣長幼之序立五常十倫之教  
備孝慈生焉恩愛篤焉主威張而下安權不  
分而法一生人大賚實在於斯三代以前天  
征伐未嘗暫寧陪臣制諸侯諸侯置守兩漢及  
甕鋒鏑戶口皆多於周室之前矣夫天生蒸民  
而樹君司牧語治道者固當以既庶而安為  
本昔賢有言曰失道而後德失德而後仁失  
仁而後義失義而後亂誠謂削厚為薄散醇  
為醜又曰古者人至老死不相往來不交不  
爭自求自足蓋疾時澆巧羨往昔敦淳務以  
激勉其慕尚也然人之常情非今是古其朴  
質事小固信固可美而鄙風弊俗或亦有之

緬惟古之中華多類今之夷狄有居處巢穴

焉上古中華亦穴居野處後代聖人易之以  
宮室今室章國及黔中羈縻東諸夷及附

國皆巢居穴處諸夷狄處有葬無封樹焉古上

聖王易之葬衣之以棺槨今薪葬中野不封不樹後代

以甬貂流求國死無棺槨草裹屍以親土而

葬上不起墳諸夷狄殯葬或以火焚或棄水

石潭大抵習俗既殊其法各異不可遍舉矣

有手團食焉殷禮記云時中華人尚以手團食  
故禮記云共飯不擇手蓋弊俗

漸改仍未盡耳今五嶺有祭立尸焉三代以  
前中華

人祭必立尸自秦漢則廢按後魏文成帝拓

跋瀆時高九獻書云祭尸久廢今風俗父母

亡歿取其狀貌類者以為尸而祭焉宴好如  
夫妻事之如父母母敗損風化驢亂情禮又周

隋蠻夷傳巴梁間風俗每春秋祭祀鄉里有  
美鬚面人送迎為尸以祭之今都道州人每  
祭祀迎同姓丈夫婦人伴聊陳一二不能遍

神以亨亦為尸之遺法



舉夏商以前臣不諱君名子不諱父名自有彈衆論不可其地偏其氣梗不生聖哲莫革舊風  
訓誥之所不可禮義之所不及外而不內踈  
而不戚來則禦之去則備之前代達識之士  
亦已言之詳矣歷代觀兵黷武討伐戎夷爰  
自嬴秦禍患代有始皇恃百勝之兵威既平  
六國終以事胡為弊漢武資文景之積蓄務  
恢封略天下危若綴旒王莽復元始之全實  
志滅匈奴海內遂至潰叛隋煬帝承開皇之  
殷盛三駕遼左萬姓怨苦而亡夫持盈固難  
知足非易唯後漢光武深達理源建武三十  
年人康俗阜臧官馬武請殄匈奴帝報曰捨

近而圖遠勞而無功捨遠而謀近逸而有終  
務廣地者荒務廣德者強有其有者安貪入

有者殘自是諸將莫敢復言兵事於戲持盈

知足豈特治身之本亦乃治國之要歟宋文

中比西漢之景分命諸將經略河南致拓跋

瓜步之師因而國蹙身裁陳宣令主江明入

安呂梁二十萬卒悉為周師所虜由是力殫

財竭旋為隋氏削平是昏昧持盈不能知足

也故我國家開元天寶之際宇內謐如邊將邀

寵競圖勲伐西陲青海之戍東北天門之師

磧西恒邏之戰雲南渡瀘之役於異域數十

萬人天寶中哥舒克吐蕃青海中有

能救而全沒安祿山討奚契丹於天門嶺十  
萬衆沒揚國忠計蠻閣向無幽寇內侮天下四



征未息離潰之勢其可量耶前事之元龜足  
為殷鑑者矣

東

東夷

白虎通云夷者踣也言無禮儀或云夷者抵也言仁而好生萬物抵地而出故天性柔順

道以有九種曰畎夷方夷黃夷白夷赤夷玄夷風

夷陽夷于夷率皆土著運略喜許利飲酒歌舞或

冠弁衣錦器用俎豆所謂中國失禮求之四夷者

也凡蠻夷戎狄總名曰夷者猶公侯伯子男皆號諸侯昔堯命羲仲宅嵎夷

曰暘谷蓋日之所出也夏后氏太康失德夷人始

叛其後知后發即位賓于王門獻其樂舞桀為暴

虐諸侯內侵商湯革命伐而定之至于仲丁藍夷

作寇自是或服或叛三百餘年武乙衰弊東夷寢

盛遂分遷淮岱漸居中土周初封商太師國於朝

鮮太師為周陳洪範其地今安東府之東悉為東夷所據時管蔡畔周乃招

誘淮夷作亂周公征定之其後徐夷僭號穆王命

楚滅之徐偃王也至楚靈王會申亦來同盟後越遷琅

琊遂陵暴諸夏侵滅小國秦并天下其淮泗夷皆

散為人戶其朝鮮歷千餘年至漢高帝時滅武帝

元狩中開其地置樂浪等郡至後漢末為公孫康

所吞魏晉文得其地其三韓之地在海島之上朝

鮮之東南百濟新羅魏晉以後分五韓地新羅又

在百濟之東南倭又在東南倭島隔越大海夫餘

在高麗之北挹婁之南其倭及夫餘自後漢百濟

新羅自魏歷代並朝貢中國不絕而百濟唐顯慶



中蘇定方滅之高麗本朝鮮地漢武置縣屬樂浪郡時甚微弱後漢以後累代皆受中國封爵所都平壤城則故朝鮮國王險城也後魏周齊漸強盛隋文帝時寇盜遼西漢王諒帥兵討之至遼水遭癘疫而返煬帝三度親征初度遼水敗績再行次遼水會楊玄感反奔退又往將達涿郡屬天下賊起及飢饉旋師貞觀中太宗又親征渡遼破之高宗總章初英國公李勣遂滅其國古之肅慎耳即魏時挹婁自周初貢楛矢石砮楛音戶至魏常道鄉公末東晉元帝初及石季龍時始皆獻之後魏以後曰勿吉國今則曰靺鞨焉大抵東夷書文並同華夏其閩越之地秦平天下以為郡及秦亂其帥

又自稱王於故地武帝元封初楊僕滅其國遷其入於江淮虛其地自後雖入庶復集遂為郡縣矣

范曄論曰王制云東方曰夷夷者抵也言仁而好生萬物抵地而出事見風俗通故天性柔順

易以道御至有君子不死之國焉山海經曰

君子衣冠帶劍食獸使二文虎在傍外國圖

曰去瑯琊三萬里山海經曰不死人在交脛

東其為人黑色壽不死並在東方昔箕子遠

衰殷之運避地朝鮮始其國俗未有聞也及

施八條之約使入知禁遂乃邑無淫盜門不

夜閉福開也回頑薄之俗就寬略之法行數百

千年故東夷通以柔謹為風異乎三方者苟



政之所暢則道義存焉仲尼懷憤以為九夷  
可居或疑其陋子曰君子居之何陋之有亦  
徒有以焉爾其後遂通接商賈漸交上國而  
燕入衛滿擾雜其風擾亂也於是從而澆異焉  
老子曰法令滋彰盜賊多有若箕子之省簡  
文條而用信義其得聖賢作法之源矣

### 朝鮮

朝鮮

晉張華曰朝鮮者泉水列水汕水三水合為列水疑樂浪朝鮮取名於此也

昔武

王封殷大師箕子於其地箕子教以禮義田蠶又

制八條之教

前書曰其法相殺者以當時償殺相傷者以穀償相盜者男沒入為其家

十萬音義曰八條不甚見也其人終不相盜無門

戶之閉婦人貞信飲酒以遵豆其後四十餘代至

戰國時朝鮮準亦僭稱王始全燕時嘗略屬焉為  
置吏築障塞秦滅燕屬遼東外徼秦遼東郡唐安東府之東地  
及秦亂燕齊趙人往避地者數萬口漢興為其遠  
難守復修遼東故塞至涿水為界涿水反屬燕人盧  
縮反入匈奴燕人衛滿亡命聚黨千餘人杜回反  
結蠻夷服而東走出塞度涿水擊破朝鮮王準居  
秦故空地上下障

魏略曰昔箕子之後朝鮮侯見周衰燕自尊  
為王欲東略地朝鮮侯亦自稱為王欲興兵  
遂擊燕以尊周室其大夫禮諫之乃止使禮  
西說燕燕止之不攻後子孫稍驕虐燕乃遣  
將秦開攻其西方取地二千餘里至滿潘汗



為界朝鮮遂弱及秦并天下使蒙恬築長城  
到遼東時朝鮮王否立畏秦襲之略服屬秦  
不肯朝會否死其子準立二十餘年而陳項  
起天下亂燕齊趙民愁苦稍稍亡往準準乃  
置之於西方及漢以盧縮為燕王朝朝鮮與燕  
界於涓水及縮反入匈奴燕人衛滿亡命為  
胡服東渡涓水詣準降說準求居西界故中  
國亡命為朝鮮藩屏準信寵之拜為博士賜  
以圭封之百里令守西邊滿誘亡黨衆稍多  
乃詐遣人告準言漢兵十道至求入宿衛遂  
還政準與滿戰不敵也

後稍役屬真蕃朝鮮諸夷及故燕齊亡命者王之

都王險

在涓水之東

會孝惠高后時天下初定遼東太

守即約滿為外臣保塞外以故滿得兵威財物侵  
降其旁小邑真蕃臨屯皆來服屬地方數千里傳  
子至孫右渠所誘漢亡人滋多初漢約朝鮮蠻夷  
君長欲入見天子勿得禁止以聞右渠既未嘗入  
真蕃辰國謂辰韓也欲上書見天子又雍闕弗通  
元封二年漢使涉何譙諭右渠終不肯奉詔使裨  
王長送何至涓水何刺殺之歸報曰殺朝鮮將上  
為其名美弗詰拜何遼東東部都尉朝鮮怨發兵  
襲攻殺之漢遣樓船將軍楊僕從齊浮渤海兵五  
萬左將軍荀彘出遼東誅右渠發兵距險漢兵不  
利天子為兩將未有功乃使衛山因兵威往諭右



渠右渠見使者頓首謝願降恐將詐殺臣今見信  
節請服降遣太子入謝獻馬五千疋及饋軍糧人  
衆萬餘持兵方渡沮水使者與左將軍疑其為變  
謂太子已服降宜令人毋持兵太子亦疑使者左  
將軍詐之遂不度沮水復引歸山報天子誅山會  
丘圍之右渠堅城守數月未能下朝鮮王乃私約  
降樓船兩將不相得兵久不決左將軍執樓船併  
其軍因急擊朝鮮王不肯降元封三年夏尼谿相  
參乃使人殺王右渠來降遂定朝鮮為真蕃臨屯  
樂浪玄菟四郡後患為東夷之地昭帝時罷臨屯真蕃以  
并樂浪玄菟自內屬以後風俗稍薄法禁亦浸多  
至於六十餘條

濊  
音穢

濊亦朝鮮之地南與辰韓北與高句麗沃沮接東  
窮大海西至樂浪漢武帝元朔元年濊君南閭等  
畔朝鮮率二十八萬口詣遼東內屬帝以其地為  
蒼海郡數年乃罷至元封三年滅朝鮮分置四郡  
昭帝時并二郡入樂洛玄菟復徙玄菟居句麗自  
單大嶺以東沃沮濊貊并屬樂浪後以境土廣遠  
復分嶺東七縣置樂浪東部都尉光武建武六年  
省都尉官遂彙領東地悉封其渠帥為縣侯皆歲  
時朝賀無大君長自漢以來其官有侯邑君三老  
統主下戶其者舊自謂與高麗同種言語法俗大  
抵相類其人性謹愿少者慾有耻男女衣皆著曲



領男子繫銀花廣數寸以為飾其俗重山川山川  
各有部分不得輒相干涉同姓不婚多所忌諱疾  
病死凶即灑舊宅更作新居知種麻養蠶綿布曉  
候星宿先知年歲豐約不以珠玉為寶常用十月  
祭天晝夜飲酒歌舞名曰舞天又祭虎以為神其  
邑落有侵犯者輒相罰責生口牛馬名之為責禍  
少寇盜作矛長三丈或數人共持之能步戰樂浪  
檣弓出其地又多文豹有果下馬高三尺乘之可  
於果樹下行也其海出班魚皮漢時常獻之魏齊  
王正始六年不耐濊侯等舉邑降四時詣樂浪帶  
方二郡朝謁並今東夷之地有軍征賦調如中華人馬  
馬韓

韓有三種一曰馬韓後漢時通焉二曰辰韓三曰  
弁韓馬韓在西有五十四國其地與樂浪南倭接  
辰韓在東十有二國其北與穢貊接弁辰在辰韓  
之內率有二國其南亦與倭接凡七十八國百濟  
是其一焉大者萬餘戶小者數千家各在山海間  
地合方四千餘里東西以海為限皆古之辰國也  
馬韓最大其立其種為辰王都目支國盡王三韓  
之地其諸王先皆是馬韓種人焉馬韓人知田蠶  
作綿布出大栗如梨有長尾鷄尾長五尺邑落雜  
居亦無城郭作土室形如冢開戶在上不知跪拜  
無長幼男女之別不貴金寶錦罽不知騎乘牛馬  
唯重纓珠以綴衣為飾及懸頸乘耳大率皆魁頭



露紒

魁頭猶科頭也謂以髮紒繞成科結也

布袍草履其人壯勇

少年有築室作力者輒以繩貫脊皮絕以大木嚙

呼為健常以五月祭鬼神晝夜酒會羣聚歌舞舞

輒數十人相隨蹋地為節十月農功畢亦復如之

諸國邑各以一人主祭天神號為天君又立蘇塗

魏志曰諸國各有別邑為蘇塗諸亡逃至其中皆不還之蘇塗之義有似浮屠建大木以

縣鈴鼓事鬼神其南界近倭亦有文身者其國各

有帥大者自名為臣智其次為邑借散在山海間

無城郭有愛襄國牟水國桑外國小石索國大石

索國優休牟涿國臣漬沽國伯齊國速盧不斯國

日華國古誕者國古離國怒藍國月支國治離牟

盧國素謂乾國古爰國莫盧國卑離國占離卑國

占釁國支侵國狗盧國卑彌國監奚卑離國古蒲

國致利鞠國丹路國兒林國駟盧國內卑離國感

奚國萬盧國辟卑離國舊斯烏旦國一離國不彌

國支半國狗素國樓盧國牟盧卑離國臣蘇塗國

莫盧國古臘國臨素半國臣雲新國如來卑離國

楚山塗卑離國一難國狗奚國不雲國不斯漬邪

國爰池國乾馬國楚離國凡五十餘國大國萬餘

家小國數千家總十餘萬戶辰王治月支國臣智

或加優呼臣雲遣支報安邪跋支漬臣離兒不例

拘邪秦支廉之號其官有魏率善邑君歸義侯中

郎將都尉伯長侯初朝鮮王準既為衛滿所攻奪

將其左右官人走入海攻馬韓破之自立為韓王



魏略曰其子友親留在國因冒姓其後絕滅今韓氏準王海中不與朝鮮相往來

人猶有奉其祭祀者準既滅馬韓韓人復自為辰王建武三十年韓人廉斯人蘇馬提等詣樂浪貢獻光武封蘇馬提為漢廉斯邑君使屬樂浪郡四時朝謁靈帝末韓濊並盛郡縣不能制百姓苦亂多流亡入韓者獻帝建安中公孫康分屯有有鹽縣屯有有鹽並漢遼東屬郡唐並為東夷地以南荒地為帶方郡遣公孫模張敞等收集遺民興兵伐韓濊舊民稍出是後倭韓遂屬帶方魏景初中明帝密遣帶方太守劉昕樂浪太守鮮于嗣越海定二郡諸韓國臣智加賜邑君印綬其次為邑長其俗好衣幘下戶諸郡朝謁皆假衣幘自服印綬衣幘千有餘人部從

事吳林以樂浪本統韓國分割辰韓八國以與樂浪晉武帝太康元年二年其王頻遣使入貢方物七年八年十年又頻至太熙元年諸東夷校尉何龕上獻咸寧三年復來明年又請內附其王來朝自後無聞三韓蓋為百濟新羅所吞併又有州胡在馬韓之西海中大島上其人差短小言語不與韓同皆髡頭如鮮卑但衣韋衣有上無下略如裸勢養牛豕乘船來貨市韓中

### 辰韓

辰韓者老自言秦之亡入避苦役來適韓國馬韓割其東界地與之有城柵其言語有類秦人由是或謂之為秦韓其王常用馬韓人作之世世相係



襲辰韓不得自立為王明其為流移之人故也其名國為邦弓為弧賊為寇行酒為行觴相呼皆為徒諸小邑各有渠帥大者名臣智次有險側次有樊穢次有殺突次有邑借皆其官名土地肥美宜五穀知蠶桑作縑布乘駕牛馬嫁娶以禮其俗男女有別以大鳥羽送死其意欲使死者飛揚國出鐵韓濊倭皆從取之諸市買皆用鐵如中國用錢又以供給二郡俗喜歌舞飲酒鼓琴瑟其瑟形似筑彈之亦有音曲兒生便以石厭其頭欲其匾故辰韓人皆匾頭匾音補男女近倭亦文身便步戰兵仗與馬韓同其俗行者相逢皆住讓路晉武帝大康中三來朝貢

### 弁辰

弁辰與辰韓雜居亦有城郭衣服居處與辰韓同言語風俗相似祠祭鬼神有異施竈皆在戶西其人形皆長大美髮衣服潔清而刑法嚴峻其國近倭故頗有文身者

### 夫餘

夫餘國在玄菟北千里南與高句驪東與挹婁西與鮮卑接北有弱水地方二千里本濊地也初北夷索離國王出行索或作曩音度洛反其侍兒於後姪身音難人鳩王還欲殺之侍兒曰前見天上有氣大如鷄子乘降我因以有身王囚之後遂生男王令置於豕牢牢音園豕以口氣噓之不死復徙於馬蘭蘭音欄也



馬亦如之王以為神乃聽母收養名曰東明東明  
長而善射王忌其猛復欲殺之東明奔走南至掩  
淲水今高麗中有蓋斯水疑此水是也以弓擊水魚鼈皆聚浮水  
上東明乘之得度因至夫餘而王之馬於東夷之  
域最為平敞土宜五穀出名馬赤玉貂豹無前足  
八反如大珠如酸棗以負柵為城有宮室倉庫牢獄  
其入麤大疆勇而謹厚不為寇鈔以弓矢刀矛為  
兵以六畜名官有馬加牛加狗加其邑落皆主屬  
諸加食飲用俎豆會同拜爵洗爵揖讓升降以臘  
月示天太會連日飲酒歌舞名曰迎鼓是時斷刑  
獄解囚徒有軍事亦祭天殺牛以躡占其吉凶魏志  
曰牛躡解者為凶行人無晝夜好歌吟音聲不絕其

俗用刑嚴急被誅者皆沒其家人為奴婢盜一責  
十二男女淫皆殺之尤治惡妬婦既殺復尸於山  
上兄死妻嫂死則有槨無棺殺人殉葬多者以百  
數其王葬用玉匣漢時常豫以玉匣付玄菟郡王  
死則迎取以葬焉建武中東夷諸國皆來獻見二  
十五年夫餘王遣使奉貢光武厚荅報之於是使  
命歲通至安帝永初五年夫餘王始將步騎七八  
千人寇鈔樂浪殺傷吏民後復歸附永寧元年乃  
遣嗣子尉仇台詣闕貢獻天子賜尉仇台印綬金  
綵順帝永和元年其王來朝京師帝作黃門鼓吹  
角抵戲以遣之桓帝延熹四年遣使朝賀貢獻永  
康元年王夫台將二萬餘人寇玄菟玄菟太守公



孫域擊破之斬首千餘級至靈帝熹平三年復奉  
章貢獻夫餘本屬玄菟獻帝時其王求屬遼東云  
漢末公孫度雄張海東威服外夷夫餘王尉仇台  
更屬遼東時句麗鮮卑疆度以夫餘在二虜之間  
妻以宗女尉仇台死簡位居立無適子有孽子麻  
余位居死諸加共立麻余牛加兄子名位居為大  
使輕射善施國人附之歲歲遣使詣京師貢獻魏  
正始中幽州刺史毋丘儉討句麗遣玄菟太守王  
須詣夫餘位居遣大加交迎供軍糧季父牛加有  
二心位居殺季父季父籍沒財物遣使薄斂送官  
舊夫餘俗水旱不調五穀不熟輒歸咎於王或言  
當易或言當殺麻余死其子依慮年六歲立以為

王晉大康六年為慕容廆所襲破依慮自殺子弟  
走保沃阻夫餘庫有玉璧珪瓚數代之物傳世以  
為寶者老言先代所賜也魏略曰其國殷富自  
先世以來未嘗破壞武  
帝以何龕為護東夷校尉明年夫餘後王依羅遣  
使詣龕求率見人還復舊國龕遣督護賈沉以兵  
送之廆又要之於路沉與戰破之依羅乃得復國  
爾後每為廆掠其種人賣於國中帝又以官物贖  
還禁市夫餘之口自後無聞

倭

即日本

倭於切順貌

烏自切國名

倭在韓及帶方郡東南大海中依山島為居去樂  
浪郡境及帶方郡並一萬二千里凡百餘國自漢  
武帝滅朝鮮使驛通於漢者三十許國國在稱王



世世傳統其大倭王居邪馬臺國按今名邪摩羅

浪徼去其國萬二千里去其西北界拘邪韓國七

千餘里其地大較在會稽東治之東與朱崖儋耳

相近故其法俗多同土宜稻禾麻紵蠶桑知織績

為纁布出白珠青玉山有丹土氣溫暖冬夏生

菜茹無牛馬虎豹羊鵲鵲或作鷄其兵有矛楯木弓竹

矢或以骨為鏃男子皆黥面文身以其文左右大

小則尊卑之差其男衣皆橫幅結束相連女人被

髮屈紒衣如單被貫頭而著之並以丹朱坊身說

音蒲頓反也如中國之用粉也有城柵屋室父母兄

弟異處唯會同男女無別飲食以手而用籩豆俗

皆徒跣以蹲踞為恭敬人性嗜酒多壽考至百餘

歲者甚衆國多女子大人皆有四五妻其餘或兩

或三女人不淫不妬又俗不竊盜少爭訟犯法者

沒其妻子重者滅其門族其死停喪十餘日家人

哭泣不進酒食而等類就歌舞為樂灼骨以卜用

决吉凶行來度海令一人不擲沐不食肉不近婦

人名曰特衰若在塗吉利則顧以財物如病疾遭

害以為特衰不謹便共殺之建武中元二年倭奴

國奉貢朝賀使人自稱大夫倭國之極南界也光

武賜以印綬安帝永初元年倭國王帥升等獻生

口百六十人願請見桓靈間倭國大亂更相攻伐

歷年無主有一女子名曰卑彌呼年長不嫁事鬼

神道能以妖惑衆於是共立為王侍婢千人少有



見者唯有男子一人給飲食傳辭語居處宮室樓  
觀城柵皆持兵守衛法俗嚴峻自女王國東度海  
千餘里至拘奴國雖皆倭種而不屬女王自女王  
國南四千餘里至侏儒國人長三四尺自侏儒東  
南行船一年至裸國黑齒國使驛所傳極於此矣  
會稽海外有東鯤人鯤音達奚反分又有夷州及  
澶州傳言秦始皇遣方士徐福將童男女數千人  
入海事見史記求蓬萊神仙不得徐福畏誅不敢還遂  
止此州世世相承有數萬家人民時至會稽市會  
稽東治縣人有入海行遭風流移至澶州者所在  
絕遠不可往來南史倭西南里有海人身黑眼白  
裸而醜其肉美行者或射而食之  
文身國在倭東北七千里人體有文如獸其額上  
有三文文直者貴文小者賤土俗勸樂物豐而賤

行客不賣糧有屋宇無城郭國王所居飾以金銀  
珍麗遠屋為溼廣丈實以水銀雨則流于水銀  
之上有市則珍寶犯罪輕者鞭杖死罪則置猛獸  
之有枉則獸避而不食經宿則赦之天漢國在  
身國東五千餘里無兵戈不攻戰風俗並與文  
國同而言語異倭國有獸如牛名曰山鼠又有大  
蛇吞此獸蛇皮堅不可切其上有孔作  
開乍閉時或有光射中之蛇則死矣

魏志曰從帶方郡至倭循海岸水行歷韓國乍  
南乍東到其北岸拘邪韓國七千餘里至對海  
國其大官曰卑狗副曰卑奴母離所居絕島方  
可四百餘里土地山險多深林道路如禽鹿逕  
有千餘戶無良田食海物自活乘船南北市糴  
又南渡一海千餘里名曰瀚海至一大國官亦  
曰卑狗副曰卑奴母離方可三百里多竹木叢  
林有三千許家差有田地耕田猶不足食亦南



北市糴又渡一海千餘里至末盧國有四千餘  
戶濱山海居草木茂盛行不見前人好捕魚鰓  
水無深淺皆沉沒取之東南陸行五百里到伊  
都國官曰爾支副曰泄謨觚柄渠觚有千餘戶  
世有王皆統屬女王國郡使往來常所駐東南  
至奴國百里官曰兕馬觚副曰卑奴毋離有二  
萬餘戶東行至不彌國百里官曰多謨副曰卑  
奴毋離有千餘家南至投馬國水行二十日官  
曰彌彌副曰彌彌那利可五萬餘戶南至邪馬  
一國女王之所都水行十日陸行一月官有伊  
支馬次曰彌馬升次曰彌馬獲支次曰奴佳鞮  
可七萬餘戶自女王國以北其戶數道里可得

略載其餘旁國絕遠不可得詳次有斯焉國次  
有已百支國次有伊邪國次有郡支國次有彌  
奴國次有好古都國次有不呼國次有姐奴國  
次有對蘇國次有蘇奴國次有呼邑國次有華  
奴蘇奴國次有鬼國次有為吾國次有鬼奴國  
次有邪馬國次有躬臣國次有巴利國次有支  
惟國次有烏奴國次有奴國此女王境界所盡  
其南有拘奴國男子為王其官有狗古智卑狗  
不屬女王自郡至女王國萬二千餘里

魏景初二年既平公孫氏倭女王遣大夫難升末  
等詣郡求詣天子朝獻太守送詣都乃以金印紫  
綬封為親魏倭王升難末等並拜中郎校尉假銀



印青綬勞賜優渥正始元年太守弓遵遣使奉詔  
書印綬并齎詔賜金帛錦罽刀鏡采物倭王國使  
上表答謝詔恩其四年復遣使上獻生口方物八  
年太守三願到官倭女王卑彌呼與狗奴國男王  
卑彌弓乎素不和遣使詣郡說相攻擊狀遣塞晉  
掾史張政等賫詔告諭之卑彌呼死更立男王國  
中不服更相誅殺復立卑彌呼宗女壹與年十三  
為王國中遂定壹與遣使送政等還因獻男女生  
口貢白珠青大句珠異文雜錦晉武帝太始初遣  
使重譯入貢安帝時倭王讚遣使入朝貢宋武帝  
永初二年詔曰倭譖遠誠宜甄可賜除授文帝元  
嘉二年讚又遣使奉表獻方物讚死弟珖立遣使

貢獻自稱使持節都督倭百濟新羅任那秦韓慕  
韓六國諸軍事安東大將軍倭國王表求除正詔  
除安東將軍倭國王珖又求除正倭消等十三人  
平西征虜冠軍輔國將軍等號詔並聽之二十年  
倭國王濟遣使奉獻復以為安東將軍倭國王二  
十八年加使持節都督倭新羅任那加羅秦韓慕  
韓六國諸軍事安東將軍如故并除所上二十三  
人職濟死世子興遣使貢獻孝武大明六年詔授  
興安東將軍倭國王興死弟武立自稱使持節都  
督倭百濟新羅任那加羅秦韓慕韓七國諸軍事  
安東大將軍倭國王順帝昇明二年遣使上表言  
自昔祖彌躬擐甲胄跋涉山川不遑寧處東征毛



人五十五國西服衆夷六十六國陵平海北九十  
五國王道融泰廓土遐畿累葉朝宗不愆于歲道  
逕百濟裝飾船舫而句麗無道圖欲見吞臣亡考  
濟方欲大與奄喪父兄使垂成之功不獲一篲今  
欲練兵申父兄之志竊自假開府儀同三司其餘  
咸各假授以勸忠節詔除武使持節都督倭新羅  
任那加羅秦韓慕韓六國諸軍鎮東大將軍梁武  
帝即位進武號征東大將軍陳平至隋開皇二十  
年倭王姓阿每字多利思比孤號阿輩雞彌遣使  
詣闕上令所司訪其風俗使者言倭王以天為兄  
以日為弟天明時出聽政踞坐日出便停理務  
云委我弟文帝曰此大無義理於是訓令改之王

妻姓鷄彌沒官有女六七百人名太子謂利歌彌  
多弗利無城郭內官有十二等一曰大德次小德  
次大仁次小仁次大義次小義次大禮次小禮次  
大智次小智次大信次小信負無定數有軍尼一  
百二十八猶中國牧宰八十戶置一伊尼翼如今  
里長也十一尼翼屬一軍尼其服飾男子衣裙襦  
其袖微小履如屨形漆其上繫之脚人庶多跣足  
不得用金銀為飾故時衣横幅結束相連而無縫  
頭亦無冠但垂髮於兩耳上至隋其王始制冠以  
錦綵為之以金銀鏤花為飾婦人束髮於後亦衣  
裙襦裳皆有襪撒竹聚以為梳編草為薦雜皮為  
表緣以文皮有弓矢刀稍弩積斧漆皮為甲骨為



矢鏑雖有兵無征戰其三朝會必陳設儀仗其國  
樂戶可十萬俗殺人強盜及姦皆死盜者計贓酬  
物無財者沒身為奴言餘輕重或流或杖每訊寃  
獄不承引者以木壓膝或張強弓以弦鋸其項或  
置小石於沸湯中令所競者探之云理曲者即手  
爛或置蛇甕中令取之云曲者即螫手人頗恬靜  
罕爭訟少盜賊樂有五絃琴笛男女多黥臂點面  
文身沒水捕魚無文字唯刻木結繩敬佛法於百  
濟求得佛經始有文字知卜筮尤信巫覡每至正  
月一日必射戲飲酒其餘節略與華同好棊博握槊  
擲蒲之戲氣候温煖草木冬青土地膏腴水多陸  
少以小環挂顛顛項令入水捕魚日得百餘頭俗

無盤俎藉以櫛葉食用手舖之性質直有雅風女  
多男少婚嫁不取同姓男女相悅者即為婚婦入  
夫家必先跨火乃與夫相見婦人不淫妬死者斂  
以棺擲親賓就屍歌舞妻子兄弟以白布制服貴  
人三年殯庶人卜日而瘞及葬置屍船上陸地牽  
之或以小輿有阿蘇山其石無故火起接天者俗  
以為異因行禱祭有如意寶珠其色青大如鷄卵  
夜則有光云魚眼睛也新羅百濟皆以倭為大國  
多珍物並仰之恒通使往來大業三年其王多利  
思比孤遣朝貢使者曰聞海西菩薩天子重興佛  
法故遣朝拜無沙門數十人來學佛法國書曰日  
出處天子致書日沒處天子無恙云云帝覽不悅



謂鴻臚卿曰夷書有無禮者勿復以聞明年上遣  
文林郎裴世清使倭國度百濟行至竹島南望耽  
羅國經都斯麻國迥在大海中又東至一支國又  
至竹斯國又東至秦三國其人同於華夏以為夷  
洲疑不能明也又經十餘國達於海岸自竹斯國  
以東皆附庸於倭倭王遣小德何葦臺從數百人  
設儀仗鳴鼓角來迎後十日又遣大禮奇多毗從  
二百餘騎郊勞既至彼都其王與世清來貢方物  
此後遂絕唐太宗貞觀五年遣使入朝帝矜其遠  
詔有司無拘歲貢遣新州刺史高仁表往諭與王  
爭禮不平不肯宣詔而還久之更附新羅使者上  
書求徵初其王孝德即位改元白雉獻琥珀碼碯

時新羅為高麗百濟所暴高宗賜璽書令出兵援  
新羅未幾孝德死子天豐財立死子天智立明年  
使者與蝦蟇人偕朝蝦蟇人亦居海島中其使者  
鬚長四尺許珥箭於首令人戴瓠立數百步射無  
不中者天智死子天父立死子總符立咸亨元年  
遣使賀平高麗後稍習夏音惡倭名更號日本使  
者自言國近日所出以為名或云日本乃小國為  
倭所併故冒其號使者不以情故疑焉又妄夸其  
國都方數千里南西盡海東北限大山其外即毛  
人云長安元年其王文武立改元曰大寶遣朝臣  
真人栗田貢方物朝臣真人者猶唐尚書也冠進  
德冠頂有華薦四被紫袍帛帶真人好學能屬又



進止有容武后宴之麟德殿授司膳卿還之文武  
死子阿用立死子聖武立改元曰白龜開元初粟  
田復朝請從諸儒授經詔四門助教趙玄默即鴻  
臚等為師獻大幅巾為贄悉賞物貨書以歸其副  
朝臣仲滿慕華不肯去易姓名曰朝衡歷左補闕  
儀王友多所該識久乃還聖武死女孝明立改元  
曰天平勝寶大寶十二載朝衡復入朝上元中擢  
左散騎常侍安南都護新羅梗海道更繇明越州  
朝貢孝明死大炊立死以聖武女高野姬為王死  
白璧立建中元年使者真人興能獻方物真人蓋  
因官而氏者興能善書其紙似璽而澤人莫識貞  
元末其三曰桓武遣使者朝其學子橘免勢浮屠

空海願留肄業歷二十餘年使者高階真人來請  
免勢等俱還詔可次諾樂立次嵯峨立次淳和次  
仁明仁明直開成四年復入貢次文德次清和次  
陽成次光孝直光啓元年其東海嶼中又有邪古  
波邪多尼三小王北距新羅西北百濟西南直越  
州有絲絮怪玳云宋雍熙元年本國僧奮然與其  
徒五人浮海而至獻銅器十餘事并本國職負今  
年代紀各一卷奮然衣綠自云姓滕原氏父為真  
連真連其國五品官也奮然善隸書而不通華言  
問其風土但書以對上召見存拊甚厚賜紫衣上  
聞其國王一姓傳繼臣下皆世官因謂宰相曰此  
島夷耳乃世祚遐遠其臣亦繼襲不絕蓋古之道



也中國唐季寓縣分割梁周五代享歷尤促大臣  
世冑鮮能嗣續可嘆也其國多中國典籍奮然之  
來復得孝經一卷越王孝經新義第十五卷皆  
金縷紅羅標水晶為軸孝經即鄭氏註者越王乃  
唐太宗子越王貞新義者記室參軍任希古等撰  
也奮然又求印本大藏經詔給之 二年隨台州  
寧海縣商人船歸其國後數年遣弟子奉表來謝  
又別啓貢佛經及方物

奮然書曰國中有五經書及佛經白居易集七  
十卷並得自中國土宜五穀而少麥交易用銅  
錢文曰乾文大寶畜有水牛驅羊多犀象產絲  
蠶多織綉薄緻可愛樂有中國高麗二部四時

寒暑大類中國國之東境接海島夷人所居身  
面皆有毛東與州產黃金西別島出白銀以為  
貢賦國王以王為姓傳襲至今王六十四世文  
武寮吏皆世官其年代紀所記云初主號天御  
中主次曰天村雲尊其後皆以尊為號次天八  
中雲尊次天忍尊次膽波尊次萬魂尊次利刹  
魂尊次國狹槌尊次角龔魂尊次津舟尊次面  
重見尊次國常立尊次天鑑尊次天萬尊次珠  
名杵尊次伊壯大尊次素戔烏尊次天照火神  
尊次正哉吾勝連日天押穗耳尊次天彥尊次  
炎尊次彥瀲尊以上凡十三世並都於筑紫日  
尚向宮彥瀲第四子號神武天皇日筑紫宮入



居大和州疆原宮即位元年甲寅當周僖王時  
次綏靖天皇次安寧天皇次懿德天皇次孝昭  
天皇次孝安天皇次孝靈天皇次孝元天皇次  
開化天皇次崇神天皇次垂仁天皇次景行天  
皇次城務天皇次仲哀天皇國人言今為鎮國  
香椎大神次神功天皇開化天皇之曾孫女又  
謂之息長足姬天皇國人言今為大奈良姬大  
神次應神天皇始於百濟得中國文字今號八  
番菩薩有大臣號紀武內年三百七歲次仁德  
天皇次履中天皇次反正天皇次允恭天皇次  
安康天皇次雄略天皇次顯宗天皇次仁賢天  
皇次武烈天皇次繼體天皇次安閑天皇次宣

化天皇次天國排開廣庭天皇亦名銘明天皇  
壬申歲始傳佛法於百濟國當此梁承聖元年  
次達海天皇次用名天天皇有子曰聖德太子  
年三歲聞十人語同時解之七歲悟佛法於菩  
提寺講聖鬘經天雨曼陀羅華當此隋開皇中  
遣使泛海至中國求法華經次崇峻天皇次推  
古天皇歛明天皇之女也次舒明天皇次皇極  
天皇次考德天皇百雉四年律師道照佛法至  
中國從三歲僧玄重授經律論當此永徽四年  
也次天豐財重日足姬天皇令僧智通等入唐  
求大乘法相教當此顯慶三年也次天智天皇  
次天武天皇次持總天皇次文武天皇大寶三



年當此長安元年遣粟田真人入唐求書籍律  
師道慈求經律次阿閉天皇次販天皇次聖武  
天皇寶龜元年遣僧正元昉入朝當此開元四  
年也次孝明天皇武聖天皇之女也天平勝寶  
四年當此天寶中遣使及僧入唐求內外經教  
及傳戒次大炊天皇次高野天皇聖武天皇之  
女也次白壁天皇遣二僧靈仙行賀入唐禮五  
臺山學佛法次恒武天皇遣騰元葛野與空海  
天師及延曆寺僧澄入唐詣天台山傳智者正  
觀義元和元年也次諾天皇次諾樂天皇次差  
峨天皇次淳和天皇次仁明天皇當此開成會  
昌中遣僧入唐禮五臺次文德天皇當此大中

年次清和天皇次陽城天皇次光孝天皇遣僧  
宗睿入唐傳教當此光啓元年也次仁明天皇  
當此梁龍德中遣僧寬建等入朝次醍醐天皇  
次天慶天皇次封上天皇當此周廣順年也次  
冷泉天皇今為太上天皇次守平太皇即今王  
也凡六十四世畿內有山城太和田內和泉攝  
津凡五州共統五十三郡東海道有伊賀伊勢  
志摩張參河遠江駿河伊豆甲斐相模武藏安  
房上總常陸凡十四州共統百二十六郡東山  
道有近江美濃飛驒信濃上野下野陸奥出羽  
凡八州共統百二十二郡北陸道有若狹越前  
加賀能登越中越後佐渡凡七州共統三十郡



山陰道有丹波丹彼祖馬因幡伯耆出雲石見  
隱伎凡八州共統五十二郡小陽道有播磨美  
作備前備後安藝周防長門凡八州共統六十  
九郡南海道有伊紀淡路河波諸者伊豫土佐  
凡六州共統四十八郡西海道有筑前筑後豐  
前豐後肥後日向大隅薩摩凡九州共統九十  
三郡又有一歧對馬多樞凡三島各統二郡是  
謂五畿七道凡三千七百七十二鄉四百一十  
四驛八十八萬三千三百二十九課丁課丁之  
外不可詳見皆奮然所記云按隋開皇唐永徽  
長安天寶元和門成史稱遣使來貢與此所記  
皆同大中光啓龍德及周廣順中皆嘗遣僧至

中國唐書五代史失其傳唐咸亨中及開元二  
年三年大曆十二年建中元年皆來朝貢其記  
不載

咸平五年建州海賈周世昌遭風飄至日本凡七  
年得還與其國人滕木吉至上皆召見之世昌以  
國人唱和詩來上其詞雕刻膚淺無取後賜裝錢  
遣還景德元年其國僧寂照八人來朝寂照不曉  
華言而識文字繕寫甚妙凡問答並以筆札詔號  
圓通大師賜紫方袍天聖四年明州日本國太寧  
府遣人貢方物而不持本國表詔却之其後亦  
朝貢南賈時有傳其物貨至中國者熙寧五年有  
僧誠尋至台州上天台國清寺願留州以聞詔使



赴闕誠尋獻銀香爐木榼子白琉璃五香水精紫檀琥珀所飾念珠及青色織物綾神宗以其遠人而有戒業處之開寶寺盡賜同來僧紫方袍是後連貢方物而來者皆僧也元豐元年使通事僧仲回來賜號慕化懷德大師明州又言得其國大宰府牒因使人孫忠還遣仲回等貢色段二百疋水銀五千兩州以孫忠乃泛海商客而貢禮與諸國異請自移牒報而答其物直付仲回東歸從之乾道五年附明州綱首進貢方物淳熙三年其國人泛海遭風飄至明州無口食詔給之又有百人行丐於市至臨安詔守臣支給津遣往明州養贍候有便船發回本國十年七十三人飄至秀州華亭

紹熙元年飄至泰州詔見行貨物免抽買船隻物件盡數給還仍給常平米賑恤慶元六年至平江嘉泰二年至定海縣詔並支給錢米養贍候風便津發回國

按倭入自後漢始通中國史稱從帶方至倭國循海水行歷朝鮮國乍南乍東渡三海歷七國凡一萬二千里然後至其國都又言去樂浪郡境及帶方郡並一萬二千里在會稽東與儋耳相近其地去遼東甚遠而去閩浙甚邇其初通中國也實自遼東而來故其迂回如此至六朝及宋則多從南道浮海入貢及通互市之類而不自



北方則以遼東非中國土地故也三朝志  
雍熙中僧裔然入貢歸國後奉表來謝叙  
其來則曰望落日而西行十萬里之波濤  
難盡顧信風而東別數千里之山岳易過  
何其遠也叙其歸則曰季夏解台州之纜  
孟秋達本國之郊又何其近也而繼之曰  
爰逮明春初到舊邑緇素欣待侯伯慕迎  
然則其國境雖去浙東甚近而其國都則  
又必半卒而後達歟

文獻通考卷之三百二十四

文獻通考卷三百二十五

鄱陽馬端臨貴與著

四裔考

高句麗

高句麗其先出夫餘王嘗得河伯女因閉於室內  
為日所照引身避之日影又逐既而有孕生一卵  
大如五升夫餘王棄之與犬豕皆不食棄於路  
牛馬避之棄於野衆鳥以毛茹之王剖之不能破  
遂還其母母以物裹置煖處有一男破而出及長  
字之曰朱蒙其俗言朱蒙者善射也夫餘人以朱  
蒙非人所生請除之王不聽命之養馬朱蒙私試  
知其善惡駿者減食令瘦駑者善養令肥夫餘王



以肥者自乘瘦者給朱蒙後狩于田以朱蒙善射  
給一矢朱蒙雖一矢殪獸甚多夫餘之臣又謀殺  
之其母告朱蒙朱蒙乃與馬達等二人東南走中  
道遇大水欲濟無梁追者甚衆朱蒙告水曰我是  
日子河伯外孫今追兵垂及如何得濟於是魚鱉  
為之成橋朱蒙得渡魚鱉遂解追騎不得渡朱蒙  
遂至普述水遇見三人一著麻衣一著衲衣一著  
水藻衣與朱蒙至紇升骨城遂居焉號曰高句麗  
因以高為氏其在夫餘妻懷孕朱蒙逃後生子始  
間諧及長知朱蒙為國王即與母亡歸之名曰間  
達委之國事朱蒙死子如栗如栗死子莫來乃并  
夫餘其地在遼東之東千里南與朝鮮穢貊東與

沃沮北與夫餘接地方二千里多大山深谷入隨  
而為居少田業故其俗節於飲食而好修宮室言  
語法則與夫餘同蓋其別種也跪拜曳一脚行步  
皆走凡有五族有消奴部絕奴部順奴部灌奴部

桂婁部

案今高麗五部一曰內部一名黃部即桂  
婁部也二曰北部一名後部即絕奴部也

三曰東部一名左部即順奴部也四曰南部一名  
前部即灌奴部也五曰西部一名右部即消奴部  
也本消奴部為王稍微弱後桂婁部代之其置官

有相加對盧沛者古鄒大加古鄒大加高麗掌賓  
客之官如鴻臚也主簿優台使者帛衣先入漢武帝滅朝鮮以高句

麗為縣使屬玄菟賜鼓吹伎人其俗淫皆潔淨自  
憲暮夜輒男女羣聚為倡樂好祠鬼神社稷靈星

龍星左角曰天田則農祥以十月祭天大會名曰  
也辰見祠以牛號曰靈星



東盟其國東有大穴號隧神亦以十月迎而祭之  
其公會衣服皆錦繡金銀以自飾大加主簿皆著  
幘如冠幘而無後其小加著折風形如弁無牢獄  
有罪諸加評議便殺之沒入妻子為奴婢其婚嫁  
皆就婦家生子長大然後將還便稍營送終之具  
金銀財幣盡于厚葬積石為封亦種松柏其人性  
凶急有氣力習戰鬥好寇鈔沃沮東濊皆屬焉自  
武帝昭帝賜其人以衣幘朝服鼓吹常從玄菟郡  
受之後稍驕不復請郡但於東界築小城受之名  
此城以為幘溝婁溝婁者高麗名城也王莽初發  
句麗兵伐匈奴其人不欲行迫遣之皆亡出為寇  
盜莽令嚴尤誘高麗侯入塞斬之更名高句麗王

為下句麗侯於是貊人寇邊愈甚光武建武八年  
遣使朝貢詔復其王號二十三年冬句麗蠶支大  
加戴升等萬餘口詣樂浪內屬二十五年寇右北  
平漁陽上谷太原而遼東太守祭彤以恩信招之  
皆復款塞後句麗王宮生而開目能視國人懷之  
及長壯勇數犯邊境和帝時寇遼東太守耿夔擊  
破之安帝永初三年宮遣使貢獻求屬玄菟元初  
五年復與濊貊寇玄菟建光元年幽州刺史馮煥  
等將兵出塞擊之捕斬渠帥獲兵馬財物宮詐降  
而潛遣人攻玄菟遼東焚城郭殺軍民發兵救之  
而貊人已去夏復與遼東鮮卑八千餘人攻遼隊  
遼東縣名殺略吏人秋宮遂與馬韓濊貊數千騎圍玄



菟夫餘王遣子將三萬與州郡并力破之是歲宮  
死子遂成立玄菟太守姚先上言欲因其喪發兵  
擊之議者皆以可許之尚書陳忠曰宮前桀黠先  
不能討死而擊之非義也宜遣吊問因責讓前罪  
赦不加誅取其後善安帝從之明年遂成還漢生  
口詣玄菟降詔曰遂成等桀逆無狀當斬斷菹醢  
以示百姓幸會赦令乞罪請降鮮卑歲貊連年寇  
鈔驅掠小民動以千計而裁送數十百人非向化  
之心也自今以後不與縣官戰鬥而自以親附送  
生口者皆與贖直繻人四十匹小口半之遂成死  
子伯固立其後歲貊率服東垂少事順帝陽嘉元  
年置玄菟郡屯田六部質桓之間復犯遼東安平

殺帶方令

西安帶方縣並屬遼東郡

掠得樂浪太守妻子建寧

三年玄菟太守耿臨討之斬首數百級伯固降服  
乞屬玄菟云其後王伯固死有二子長曰拔奇小  
曰伊夷模拔奇不肖國人共立伊夷模為王自伯  
固時數寇遼東又受亡胡五百餘家獻帝建安中  
拔奇怨為兄不得立與消奴加各將下戶三萬餘  
口詣公孫康降還住沸流水降胡亦叛伊夷模伊  
夷模更作新國都於九都山下拔奇遂往遼東有  
子留旬麗國古雛交駁位居是也伊夷模死子位  
宮立以曾祖名宮生能開目視及長大果殉虐今  
王生亦能視旬麗呼相似為位似其祖故名之為  
位宮宮有勇力便鞍馬魏齊王正始三年位宮寇



西安平五年幽州刺史毋丘儉將萬人出玄菟討  
之戰於沸流位宮敗走儉追至頽峴懸車束馬登  
九都山屠其所都斬首萬餘級六年毋丘儉復討  
之位宮輕將諸加奔沃沮儉使王頎追之過沃沮  
千餘里到肅慎南界刻石紀功又刊九都銘不耐  
城而還至位宮五葉孫釗晉康帝建元初慕容皝  
率兵伐之大敗單馬奔走皝乘勝追至九都焚其  
宮室掠男女五萬餘口以歸釗後為百濟所殺其  
後慕容寶以句麗王安為平州牧封遼東帶方二  
國王安始置長史司馬參軍官後略有遼東郡至  
孫高璉陳晉安帝義熙中遣長史高翼獻赭白馬  
以璉為營州諸軍事高麗王樂浪郡公宋武踐祚

復加璉官少帝時璉遣使貢方物文帝元嘉中馮  
弘為魏所攻敗奔高麗表求迎接文帝遣使迎之  
并令高麗資送璉不欲弘南襲殺弘其後每歲遣  
使十六年文帝侵魏詔璉送馬獻八百匹魏太武  
時璉遣貢使相尋歲致黃金二百斤白銀四百斤  
孝文時璉貢獻倍前其報賜亦稍加璉死百餘歲  
子雲立雲死子安立安死子延立延死子成立成  
死子陽立自東晉宋至于齊梁後魏後周其主皆  
受南北兩朝封爵分遣貢使初後魏時置諸國使  
邸齊使第一高麗次之其國東至新羅西渡遼二  
千里南接百濟北隣靺鞨一千餘里自東晉以後  
其王所居平壤城

即漢樂浪郡王儉城自為慕容  
魏來伐後徙國內城移都此城



亦曰長安城其地後漢時方二千里至魏南北漸  
徙才千餘里至隋漸大東西六千里長安城東六  
里隨山屈曲南臨渭水城內唯積倉儲器備寇賊  
至日方入固守王別為宅於其側不常居之其外  
復有國內城及漢城亦別都也其國呼為三京  
復有遼東玄菟數十城皆置官司以統攝與新羅  
每相侵奪戰爭不息官有大對盧太太兄太兄小  
兄竟侯奢烏拙太大使者大使者小使者褥奢翳  
屬仙入凡十二等分掌內外事其大對盧則以強  
弱相陵奪而自為之不由王署置復有內評五事  
褥蔭人皆頭著折風形如弁士人加挿二鳥羽貴  
者其冠曰蘇骨多用紫羅為之飾以金銀服大袖

衫大口袴素皮帶黃革履婦人裙襦加襪書有五  
經三史三國志晉陽秋兵器與中國略同及春秋  
校獵王自臨之稅布五匹穀五石游人則三年一  
稅十人共細布一匹租戶一石次七斗下五斗其  
刑法叛及謀逆者縛之柱藝而斬之籍沒其家盜  
則償十倍若貧不能償者樂及公私債負皆聽評  
其子女為奴婢以償之用刑既峻罕有犯者樂有  
五絃琴箏篳篥橫吹簫鼓之屬吹蘆以和曲每平  
初聚戲渭水上王乘腰輿列羽儀觀之事畢王以  
衣入水分為左右二部以水石相濺擲喧呼馳逐  
再三而止俗潔淨自喜尚容止以趨走為敬拜則  
曳一脚立多反拱行必挿手性多詭伏言辭鄙穢



不簡親疎父子同川而浴共室而寢好歌舞常以  
十月祭天其公會衣服皆錦繡金銀以為飾好蹲  
踞食用俎几出三尺馬云本朱蒙所乘馬種即果  
下也風俗尚淫不以為愧俗多游女夫無常人夜  
則男女羣聚為戲無有貴賤之節有婚嫁取男女  
相悅即為之男家送猪酒而已無有財聘之禮或  
有受財者人共耻之以為賣婢死者殯在屋內經  
三年擇吉日而葬居父母及夫喪服皆三年兄弟  
三月初哭泣葬則鼓舞以送之埋訖取死者生時  
服玩車馬置墓前會葬者爭取而去信佛法敬鬼  
神多淫祠有神廟二所一曰夫餘神刻木作婦人  
像曰高登神云是其始祖夫餘神之子並置官司

遣人守護蓋河伯女朱蒙云及隋平陳後湯大懼  
陳兵積穀為守拒之策開皇十七年上賜璽書責  
以每遣使人歲常朝貢雖稱蕃附誠節未盡驅逼  
靺鞨禁固契丹昔年潛行貨利招動羣小私將弩  
手巡竄下國豈非意欲不臧故為竊盜坐使空館  
嚴加防守又數遣馬騎殺害邊人恒自猜疑密覘  
消息殷勤曉示許其自新湯得書皇恐將表陳謝  
會病卒子元嗣文帝使拜元為上開府儀同三司  
襲爵遼東公賜服一襲元奉表謝恩并賀祥瑞因  
請封王文帝優冊為王明年率靺鞨萬餘騎寇遼  
西營州總管韋世冲擊走之帝大怒命漢王諒為  
元師總水陸軍討之下詔黜其爵位時魏運不繼



六軍乏食師出臨渝關復遇疾疫王師不振及次  
遼水元惶懼遣使謝罪上表稱遼東糞土臣元云  
云上乃罷兵待之如初元亦歲遣朝貢煬帝嗣位  
天下全盛高昌王突厥啓民可汗並親詣闕貢獻  
於是徵元入朝元懼藩禮頗闕大業七年帝親征  
高麗車駕度遼水止營於遼東地分道出師各頓  
兵於其城下高麗出戰多不利皆嬰城固守帝命  
諸軍攻之又敕諸將高麗若降即宜撫納不得縱  
兵入城城將陷賊輒言請降諸將奉指不敢赴機  
先馳奏比報賊守禦亦備復出拒戰如此者三帝  
不悟由是食盡師老轉輸不繼諸軍多敗績乃班  
師是行也唯於遼水西拔賊武屬邏置遼東郡及

通定鎮而還元年帝復親征敕諸軍以便宜從事  
諸將分道攻城賊勢日蹙會楊玄感作亂六軍並  
還兵部侍郎斛斯正亡入高麗高麗具知事實盡  
銳來追殿軍多敗十年又發天下兵會盜賊蜂起  
所在阻絕軍多失期至遼水高麗亦困弊遣使乞  
降因送斛斯正贖罪帝許之頗懷遠鎮受其降仍  
以俘囚軍實歸至京師以高麗使親告太廟因拘  
留之仍徵元入朝元竟不至帝更圖後舉會天下  
喪亂遂不復行唐武德四年遣使朝貢其國建官  
有九等其一曰吐粹昨沒反舊名大對盧總知國次  
曰大大兄次鬱折華言主簿次太大夫次使者次  
皂衣頭大兄東夷相傳所謂皂衣先人者以前五



官掌機密謀政事徵發兵馬選授官爵次大使者  
次大兄次收位使者次上位使者次小兄次諸兄  
次過節次不過節次先人又有狀古雛加掌賓客  
比鴻臚卿以太夫使心為之又有國子博士舍人  
通事典書客皆以小兄以上為之又其諸大城置  
僂薩比都督諸城置處間近支比刺史亦謂之道  
使其武官曰大模達比衛將軍以皂衣頭大兄以  
上為之次末客比中郎將以大兄以上為之其次  
領千人以下各有差其國五部皆貴人之族詳見前  
碣石山在漢樂浪郡遂城縣長城起於此山今驗  
長城東截遼水而入高麗遺址猶存按尚書云夾  
河古碣石即河赴海處在今北平又平壤城東北  
郡南二十里則高麗中為左碣石

有魯陽山魯城在其上西南二十里有葦山南臨  
涓水其大遼水源出靺鞨國西南山南流置安市  
小遼水源出遼山西南流與大梁水合大梁水在  
國西出塞外西南流注小遼水馬訾水一名鴨綠  
水水源出東北靺鞨白山水色似鴨頭故俗名之  
去遼東五百里經國內城南又西與一水合即蓋  
難水也二水合流西南至安平城入海高麗之中  
此水最大波瀾清澈所經津濟皆貯大船其國恃  
此以為天塹水濶三百步在平壤城西北四百八  
十里遼水東南四百八十里漢樂浪玄菟郡之地  
所據至淵滅西晉永嘉以後復陷入高麗其不  
屯有帶方安市平郭安平居龍文城皆漢二郡  
縣則朝鮮之地又遣使請道教詔沈叔安將天尊像



并道士至其國講五千文開釋玄宗自是始崇重  
之化行於國有踰釋典其後東部大人蓋蘇文弑  
其主高武其王元元在位十八年武元異母弟立其姪藏為王自為  
莫支離此官總選兵猶吏部兵部尚書於是號令  
遠近遂專國命蘇文鬚甚偉形體魁傑衣服冠履  
皆飾以金綵身佩立力常挑臂高步意氣豪逸左  
右莫敢仰視常令武官貴人附伏於地登背上下  
馬七年二月遣使內附受正朔請頒曆許之八年  
三月高祖謂侍臣曰高麗稱臣於隋終拒煬帝此  
亦何臣之有朕敬於萬物不欲驕貴但擬土地務  
共安人何必令其稱臣以自尊大裴矩溫彥博進  
曰遼東之地周為太師之國漢家之玄菟郡耳魏

晉以前近在提封之內不可許以不臣若以高麗  
抗禮四夷必當輕漢且華之與夷猶太陽之與列  
星理無降尊乃止貞觀十八年二月太宗謂侍臣  
曰高麗莫支離賊殺其主盡誅大臣夫出師吊伐  
須有其名因其殺君虐下取之苟易諫議大夫褚  
遂良進曰兵若渡遼事須尅捷萬一不獲無以威  
示遠方必更發怒再動兵衆安危難測太宗然之  
兵部尚書李勣曰近者薛延陀犯邊必欲追擊但  
為魏徵苦諫遂止向若討伐無一入生還可五十  
年間邊境無事十一月以張亮為平壤道行軍大  
總管自萊州泛海趣平壤李勣為遼東道行軍大  
總管趣遼東兩軍合勢三十日征遼東之兵集於



幽州十九年太宗親征渡遼四月李勣攻拔蓋牟  
城獲生口二萬以其城置蓋州勣又攻遼東城拔  
之以其城為遼州六月攻拔白岩城以其城為巖  
州遂引軍次安市城進兵以攻之會高麗北部僣  
薩高延壽南部高惠真率靺鞨之衆十五萬來援  
於安市城東南八里依山為陣上令所司張受降  
幕於朝堂之側夜召文武躬自指麾是夜有流星  
墜賊營中明日及戰大破之延壽惠真率三萬六  
千八百來降上以酋首三千五百人授以戎秩遷  
之內地餘三萬人悉還平壤靺鞨三千人並坑之  
獲馬萬疋牛五萬頭甲一萬領因名所幸山為駐  
蹕山命許敬宗為文勒石以紀其迹遂移軍於安

市城南久不克九月遂班師先遣遼蓋二州戶口  
渡遼乃召兵馬歷於城下而旋城主昇城拜辭太  
宗嘉其堅守賜縑百匹以勵事君者二十一年李  
勣復大破高麗於南蘇班師至頗利城渡白狼黃  
崑二水皆由膝以下勣恠二水狹淺問契丹遼源  
所在云此二水更行數里合而南流即稱遼水更  
無遼源可得也旋師之後更議再行二十二年司  
空房玄齡上表切諫乃止帝崩歲遣使者奉慰高  
宗永徽五年歲以靺鞨兵攻契丹為所敗六年新  
羅訴高麗靺鞨奪三十六城詔營州都督程名振  
等率師討之至新城敗其師火外郭及墟落引還  
顯慶三年復遣名振率薛仁貴攻之未能克後二



年天子已平百濟乃命大將軍契苾何力蘇定方  
劉伯英率諸將出但江遼東平壤道討之龍朔元  
年大募兵帝欲自行蔚州刺史李君球言高麗小  
醜何至傾中國事之有如既滅必發兵以守少發  
則威不振多發則人不安是天下疲於轉輸臣  
謂征而滅之不如勿滅帝乃止不行八月定方破  
虜兵於涇江奪馬邑山遂圍平壤明年龐孝泰以  
嶺南兵辟蛇水蓋蘇文攻之舉軍沒定方解而歸  
乾封元年歲遣子男福從天子封泰山還而蓋蘇  
文死子男生代為莫支離與弟男建男產相怨男  
生據國內城遣子獻誠入朝求救蓋蘇文弟淨土  
亦請割地降乃詔契苾何力為遼東道安撫大使

龐同善高侃為行軍總管薛仁貴李謹行殿而行  
九月同善破高麗兵男生率衆相會詔以李勣為  
遼東道行軍大總管兼安撫大使與契苾何力龐  
同善并力詔獨孤卿雲由鴨綠道郭待封積利道  
劉仁願畢列道金待問海谷道並為行軍總管受  
勣節度轉燕趙食廩遼東明年正月勣引道次新  
城合諸將謀曰新城賊西鄙不先圖餘城未易下  
遂壁西南山臨城城人縛戍酋出降勣進拔城十  
有六郭待封以舟師濟海趨平壤三年二月勣率  
仁貴拔夫餘城他城三十皆納款同善侃守新城  
男建遣兵襲之仁貴救臨戰全山不勝高麗鼓而  
進銳甚仁貴橫擊大破之斬首五萬級拔南蘇木



氏蒼岩三城引兵略地與勳會侍御史賈言志計  
事還帝問軍中云何對曰必克昔先帝問罪所以  
不得志者虜未有豐也今男生兄弟鬩狼為我向  
道虜之情偽我盡知之且高麗秘記曰不及九百  
年當有八寸大將滅高氏自漢有國今九百年勳  
年八十矣虜仍荐飢人相掠賣地震裂狼狐入城  
蚘穴于門人心危駭是行不再舉矣男建以兵五  
萬襲夫餘勳破之薩賀水上斬首五千級俘口三  
萬器械牛馬稱之進拔大行城契苾何力會勳軍  
于鴨綠拔辱夷城悉師圍平壤九月歲遣男產率  
首領百人樹素幡降且請入朝勳以禮見而男建  
猶固守出戰數北大將浮屠信誠遣謀約內應五

日闔啓兵譟而入火其門男建窘急自刺不殊執  
歲男建等收凡五部百七十六城戶六十九萬詔  
勳便道獻俘昭陵凱而還十二月帝坐含元殿引  
見勳等數俘於庭以歲素脅制赦為司平太常伯  
男產司宰少卿授男建黔州百濟王夫餘隆嶺授  
獻誠男生等官何力勳仁貴各加官有差剖其地  
為都督者九州四十二縣百復置安東都護府擢  
酋豪有功者授都督刺史令與華官參治仁貴為  
都護總兵鎮之總章二年徙高麗民三萬於江淮  
山南太長鉗牟岑率衆反立歲外孫安舜為王  
詔高侃東州道李謹行燕山道並為行軍總管討  
之遣司平太常伯楊昉綏納亡餘舜殺鉗牟岑走



新羅侃徙都護府治遼東州破叛兵於安市又敗之泉山俘新羅援兵二千李謹破之于發盧河再戰俘馘萬計於是平壤夷殘不能軍相率奔新羅凡四年乃平儀鳳二年授藏遼東都督封朝鮮郡王還遼東以安餘民先編僑內州者皆原遣徙安東都護府於新城藏與靺鞨謀反未及發召還放邛州徙其人于河南隴右弱婁者留安東藏以永淳初死贈衛尉卿葬頡利墓左舊城往往入新羅遺人散奔突厥靺鞨由是高氏君長皆絕垂拱中以藏孫寶元為朝鮮郡王聖曆初進左鷹揚衛大將軍更封忠誠國王使統安東舊部不行明年以藏子德武為安東都督後稍自國至元和末遣使

者獻樂工云唐末中原多事遂自立為君長後唐同光元年遣使奉貢其王姓高氏名字史失不紀天成中復入貢長興中權知國事王建承高氏之位遣使朝貢以建為玄菟州都督充大義軍使封高麗國王晉天福中來朝貢開運二年建死子武襲位漢軋祐末武死子昭權知國事昭周廣順初遣使朝貢以昭為特進檢校太保使持節玄菟州都督大義軍使高麗國後加太師其俗知文字喜讀書庶賤之家各於衢路造大屋謂之局堂子孫晝夜誦書習射又遣使進別叙孝經一卷越王孝經一卷越王孝經新義八卷皇靈孝經一卷孝經雌圖一卷

別叙者記孔子所生及弟子從學之事新義者以越王為問目以釋疏文



之是非皇靈止說延年辟災之事及志符文乃道  
書雖圖說日之環暈星之彗孛災異之應識緯之  
書皆不經宋太祖建隆三年昭遣其廣評侍郎李

興祐等來朝貢四年制加食邑賜功臣號開寶五  
年來貢昭卒其子佑權領國事遣使奉貢請朝命  
授官封如故太宗即位遣使加食邑功臣號佑遣  
國人金行成入就學於國子監其後行成擢進士  
第歸佑貢奉不絕太平興國七年佑卒其弟治知  
國事遣使來貢且請命詔授官封雍熙元年入貢  
三年出師北伐以其國與契丹接境常為虜所侵  
遣監察御史韓國華齎諭以出兵大攻先是契  
丹攻伐女真國路由高麗之界女真意高麗誘導  
因貢馬來懇于朝且言高麗與契丹結好為勢援

剽掠其民不復放還洎高麗使韓遂齡入貢太宗  
因出女真所上告急木契示之令歸白本國還其  
俘治聞之憂懼及國華至令人言於國華曰前歲  
冬女真馳木契來告稱契丹稱兵入其封境恐當  
道未知宜預為備當道與女真雖為隣國而路途  
遐遠彼之情偽素知之矣貪而多詐未足信也其  
後又遣人來告曰契丹兵騎已濟梅河當道猶疑  
不實未暇營救俄而契丹雲集大擊女真殺獲甚  
衆餘族敗散逃遁契丹尾捕及于當道西北德昌  
德成威化光化之境擒俘而去時契丹遣騎至德  
米河北呼闕城戍卒而告曰女真寇我邊鄙率以  
為常今復仇已畢整兵回矣當道雖問退師猶憂



不測遂命僚屬會儀安危之計乃以女真避兵來  
奔二千餘衆資給而遣之女真又勸當道控梅河  
津要築治城壘以為防遏之備亦以為然方令行  
視興工不意女真兇狡變詐潛師奄至殺掠吏民  
驅虜丁壯沒為奴隸轉徙鄰番以其歲貢中朝不  
敢發兵報怨豈期反相誣搆以惑聖聰當道世稟  
正朔殆將三紀踐修職貢克荷寵靈敢有二心交  
通外國况契丹介居遼海之外復有大梅小梅二  
河之阻女真渤海本無定國從河徑路以通往復  
日月至明諒垂照鑑間者女真逃難之衆罔不存  
恤亦有授以官秩尚在本國其職居高者有物畜  
尼于等十數人欲望召赴京闕與當道入貢之使

庭辨其事則丹石之誠庶幾昭雪國華諾之命發  
兵西會治遷延未即奉詔國華屢督之得報發兵  
乃還十月遣使朝貢又遣本國學生崔罕王彬詣  
國子監肄業端拱二年來貢復遣僧如可來覲請  
釋氏大藏經詔給之四年詔遣陳靖等使其國加  
治檢校太師仍存問軍吏耆老靖等自東牟趣八  
角海口得高麗使白恩柔所乘海船及高麗水工  
登舟自芝岡島順風泛大海再宿抵甕津口登陸  
行百六十里抵高麗之境曰海州又百里至閭州  
又四十里至白州又四十里至其國治迎使于郊  
盡藩臣之禮延留靖等七十餘日饋遺甚厚附表  
稱謝先時詔賜高麗賓貢進士王彬崔罕等及第



授以官遣歸本國治復附表謝又上言願賜板本  
九經用敦儒教詔從之五年六月遣使元郁來乞  
師愬以契丹寇境朝廷以夷狄相攻固其常北鄙  
甫寧不可輕動干戈為國生事但回詔尉撫厚賜  
其使遣遂自是受制于契丹朝貢中絕治卒弟誦  
立嘗遣兵校徐遠來俟朝廷德音遠久不至咸平  
三年其臣吏部侍郎趙之遴命牙將朱仁詔至登  
州偵之州將以聞上特召見仁詔仁詔因自陳國  
人思慕皇化為契丹羈制之狀乃賜誦鈿函詔一  
道令仁詔齎還六年誦使戶部郎中李宣來謝恩  
且言晉割燕薊以屬契丹遂有路趣玄菟屢來攻  
伐求取不已乞王師屯境上為割制詔書優答之

誦卒弟詢權知國事先是契丹既襲高麗遂築六  
城曰興化曰鐵州曰道州曰龍州曰龜州曰鄆州  
於境上契丹以為二已遣使來求六城詢不許遂  
舉兵奄至其城下焚蕩官室剽劫去人詢徙居昇  
羅州以避之兵退乃遣使請和於契丹契丹堅以  
六城為辭自是調兵守六城大中祥符三年契丹  
大舉伐之詢與女真設奇邀擊殺戮契丹殆盡詢  
又於鴨綠江東築城與來遠城相望跨江為橋潛  
兵以固新城七年遣使以金線織成龍鳳鞍并繡  
龍鳳鞍幘各一副細馬二疋散馬二十疋來貢使  
還賜詢詔書七通并衣帶銀綵鞍馬等八年詔登  
州置館於海次以待使者其年又遣御事民官侍



郎郭元來貢元自言本國城無垣墻府曰開成管  
六縣民不下三五千有州軍百餘置十路轉運司  
統之每州管縣五六小者亦三四每縣戶三四百  
國境南北千五百里東西二千里軍民雜處隸軍  
者不黥面方午為市不用錢第以布米貿易民家  
器皿悉以銅為之樂有二品曰庫樂曰鄉樂三歲  
一試舉人有進士諸科算學每試百餘人登第者  
不過二二十每正月一日五月五祭祖禰又正月  
七日家為王母像戴之二月望僧俗然燈如中國  
上元節上巳日以青艾染餅為盤羞之冠端午有  
鞦韆之戲士女服尚素地產龍鬚席白碯紙狼尾  
筆元解頰恭恪每受宴賜必自為謝表粗有文采

朝廷待之亦厚九年辭還賜詢詔書七函襲衣金  
帶器幣鞍馬及經史曆日聖惠方等元又請錄國  
朝登科記及所賜御詩以歸從之天禧元年遣使  
貢方物三年九月登州言高麗進奉使至秦王水  
口遭風覆舟漂失貢物詔遣內臣撫之十二月其  
使入見貢錦罽衣褥甲刀鞍馬樂物等又進中布  
二千匹求佛經一藏詔賜經却布以其覆溺匱乏  
別賜衣服繒綵明州登州屢言高麗海船有風漂  
至境上詔令存問給度海糧遣還仍為著例五年  
詢遣使來謝恩且言與契丹脩好又表乞陰陽地  
里書聖惠方並賜之高麗遣其國人金行成康戩  
肄業國學登進士第因留仕中朝行成仕至殿中



丞通判安州戩歷官知江陰軍江州又知峽越二  
州京西轉運使加工部郎中俱以能稱既死詔各  
賜其子補大廟齋郎太常寺奉禮郎云天聖八年  
詢復遣使貢方物明年辭歸其後絕不通中國者  
四十三年詢孫徽嗣立是為文王熙寧二年其國  
禮賓省移牒福建轉運使羅極云商人黃真洪萬  
來稱運使奉密旨令招接通好當國僻居賜谷邈  
戀天朝祖禰以來梯航相繼蕞爾平壤邇于大遼  
附之則為睦鄰踈之則為勁敵慮邊騷之未息蓋  
陸襲以靡遑久困羈縻難圖携貳故遠述職致有  
積守運屬垂鴻禮稽展慶大朝化覃無外度豁包  
荒謹當遵道遄赴藁街但茲千里之傳志恐匪重

宵之紆眷今以公狀附真萬西還俟得報音即備  
禮朝貢徽又自言嘗夢至華作詩紀其事三年極  
以聞時議者亦謂可結之以謀契丹帝許焉命極  
諭以供擬腆厚之意徽遂遣其臣金悌等百十八  
人來詔待之如夏國使故時遼人往返皆自登州  
七年遣使言欲遠契丹乞改塗由明州詣闕從之  
郡縣供頓無舊準頗擾民詔立式盼下費悉官給  
又以其不通華言恐規利者私與交關令所在禁  
止徵問遺二府甚厚詔以付市易務售纁帛答之  
又表求醫藥畫塑之工以教國人詔羅極募願行  
者九年以後其使來者多待之寔厚嘗獻伶官十  
餘輩曰夷樂無足觀止欲潤色國史爾帝以其國



尚文每賜書詔必選詞臣著撰而擇其善者所遣使者其書狀官必召赴中書試以文乃遣元豐元年始遣安燾陳睦往使自明州定海絕洋而東既至國人歡呼出迎徽具袍笏玉帶拜受詔與燾睦元禮館之別宮標曰順天館言尊順中國如天云徽病乞醫藥二年遣使挾醫往診治徽遣使致謝尋獻日本所造車曰諸侯不貢車服故不敢與土貢同前此貢物至輒下有司估直償絹萬緡至是命勿復估以萬緡為定數六年徽卒徽在位三十八年治尚仁恕為東夷良主然猶循其俗王女不下嫁臣庶必歸之兄弟宗族貴臣亦然次子運諫以為既通上國宜以禮革故習不從計聞詔明州

修浮屠供一月遣使慰奠子順王勲嗣百日卒弟宣王運嗣運仁賢好文內行飭備每賈客市書至則潔服焚香對之八年遣其弟僧統來朝求問佛法并獻經像拈宗立遣兩使來奉慰致賀請市刑法文書太平御覽文苑英華詔唯賜文苑英華一書以名馬錦綺金帛報其禮運立四年卒子懷王堯嗣未幾卒叔父維林公熙嗣位凡數歲使不至元祐四年其王子義天使僧壽介至杭州祭亡僧言國母使持二金塔為兩宮壽知州蘇軾奏却之熙後避遼主諱改名顯顯性貪吝好奪商賈利富室犯法輒以繫責贖雖微罪亦輸銀數斤五年復通使賜銀器五千兩七年遣使來獻黃帝鍼經請



市書甚衆禮部尚書蘇軾言高麗入貢無絲毫利而有五害今請諸書與收買金箔皆宜勿許詔許買金箔然卒市冊府元龜以歸元符中遣士賓貢徽宗立遣使來弔賀崇寧二年詔劉達吳拭往使顯卒子侯嗣貢使接踵且士子金瑞等五人入大學朝廷為置博士政和中升其使為國信禮在夏國上與遼人皆隸樞密院又改引伴押伴官為接送伴賜以大晟燕樂邊豆簠簋尊壘等器至宴使者於睿謨殿中宣和四年侯卒初麗俗兄終弟及至是諸弟爭立其相李資深立侯子楷來告哀求醫於朝詔使二醫往留二年而歸楷語之聞朝廷將用兵伐遼遼兄弟之國存之足為邊扞女真狼

虎爾不可交也願二醫歸報天子宜早為備欽宗立賀使至明州御史胡舜陟言高麗靡敝國家五十年政和以來入使歲至淮浙之間苦之彼昔臣事契丹今必事金國安知其不窺我虛實以報且止勿使來乃詔留館明州而納其贄幣明年始歸國自王徽以降雖通使於我然受契丹封冊奉其正朔上朝廷及他文書蓋有稱甲子者歲貢契丹至於六而誅求不已常云高麗乃我奴耳南朝何以厚待之遼使至其國尤倨暴館伴及公卿小失意輒行粹箠聞我使至必倣他事來覘分取賜物嘗詰其西向修貢事麗人表謝其略曰中國三甲子方得一朝大邦一周天每脩六貢契丹悟乃得



免其國西南接契丹特鴨綠江以為固其東所臨  
海水清澈下視十丈東西望明州水皆碧玉居開  
州蜀莫郡曰開成府依大山置宮立城壁名其山  
曰神嵩民居皆茅茨大止兩椽覆以瓦者才十二  
以新羅為東州樂浪府號東京百濟為金州金馬  
郡號南京南平壤為鎮州號西京西京最盛總之  
凡三京四府八牧郡百有十八縣三百九十州島  
三千七百郡邑之小者或止百家男女二百十萬  
口兵民僧各居其一地寒多山土宜松栢有杭黍  
麻麥而無秫以杭為酒少絲蠶匹縑直銀十兩多  
衣麻苧王出乘車駕牛歷山險乃騎紫衣行前捧  
護國仁王經以導令曰教曰宣臣民呼之曰聖上

私謂曰嚴公妃曰宮主百官名稱階勳功臣檢校  
頗與中朝相類過御史臺則下馬違者有劾士人  
以族望相高柳崔金李四姓為貴種無宦者以世  
族子為內侍六衛歲十二月朔王坐紫門小殿注  
官外官則付國相有國子監四門學學者六千人  
貢士三等王城曰土貢郡邑曰鄉貢他國人曰賓  
貢間歲試于所屬再試于學所取不過三十四十  
人然後王親試以詩賦論三題謂之簾前重試亦  
有制科宏詞之目然特文具而已士尚聲律少通  
經王城有華人數百多閩人因賈舶至者密試其  
能誘以祿仕或強留之終身朝廷使至有陳牒來  
訴者則取以歸百官以米為俸皆給田納祿半給



死乃拘之國無私田民計口授業十六以上則充軍六軍三衛常留官府三歲一選戍西北半歲而更有警則執兵任事則服勞事已復歸農畝王亦自分地以供私用王母妃主世子皆受湯沐田上下以賈販利入為事日中為虛用米布貿易地產銅不知鑄錢中國所子錢藏之府庫時出傳翫而已崇寧後始學鼓鑄有海東通寶重寶三韓通寶三種錢然其俗不便也兵器踈簡無強弩大刀崇尚釋教雖王子弟亦常一人為僧信鬼拘陰陽病不服藥唯呪咀厭勝至親有病不相視殮不拊棺貧者死則露置中野歲以建子月祭天國東有穴號隧神常以十月望日祭之謂之八關齋禮儀甚

盛王與妃嬪登樓大張樂宴飲賈人曳羅為幕至百匹相聯以示富三歲大祭祠遍其封內因是歛民財而王與諸臣分取之祖廟在國門之外天祭則具車服冕圭親祠王城有佛寺七十區而無道觀大觀中朝廷遣道士往乃立福源院置羽流十餘輩俗不知醫自王侯來請醫後始有通其術者人首無枕骨皆扁側男子巾幘如唐裝婦人髻髻垂右肩餘髮被下約以絳羅賁之簪旋裙重疊以多為勝男女自為夫婦者不禁夏月同川而浴婦人僧尼皆男子拜樂聲甚下無金石之音既賜樂乃分為左右二部左曰唐樂中國之音也右曰鄉樂其故習也堂上設席升必脫履見尊者則膝行



請必跪應必唯其拜無不答子拜父猶半答其禮  
性柔仁惡殺不屠宰飲食羊豕則包以蒿而燔之  
刑無慘酷之科唯惡逆及罵父母者斬餘皆杖肋  
外郡刑殺悉送王城歲以八月慮囚死罪貸流諸  
島累赦視輕重原之自明州定海便風三日入洋  
又五日抵墨山入其境過島嶼詰曲礁石間舟行  
甚駛值礁則敗七日至禮成江江居兩山間東以  
石峽臨激而下號急水門最為險惡又三日抵岸  
有館曰碧瀾亭使人由此登陸崎嶇山谷四十餘  
里乃至其國都云女真在混同江北與高麗僅隔  
鴨綠一水其初本臣事契丹奴事高麗及其強也  
高麗反臣事之高宗建炎元年五月即位即遣胡

蠡等為高麗國信使朝廷蓋憂其通金人而金亦  
以是時遣王樞持冊使高麗則亦憂其為我用也  
蠡之回史失書二年詔募能使絕域者浙東路副  
總管楊應忱應詔請行自言隨侍其父任邊吏熟  
知虜情高麗女真路甚徑請身使三韓結雞林以  
達燕雲三月假刑部尚書往使浙東帥臣翟汝文  
奏言應忱欺罔君父自為身謀若高麗辭以大國  
假道以至燕雲而金人或請問津以窺吳越將何  
辭以對必致辱命取笑遠夷請毋遣不從六月至  
高麗見國王楷諭旨楷拜詔已與應忱等對立而  
議楷曰大國自有山東路何不由登州往應忱曰  
不如貴國最徑第煩國王傳達金國爾三節入止



二十八騎皆自齎糧措有難色已而命其臣傅佺  
館中具言金人見造舟將往二浙若引使者至  
其國異時欲假道至浙何以答之麗人之辭果如  
汝文所料應忱曰女真不能水戰佺曰彼常於海  
道往來況女真舊臣本國近乃欲令本國臣事之  
可見強弱居十數日復令其臣崔洪宰等就館議  
執前說不變館伴使文公仁亦曰往年公仁入貢  
上國嘗奏上皇金人人面獸心不可相親今十二  
年矣洪宰曰大朝何不練兵與戰應忱留高麗六  
十四日終不奉詔不得已受其拜表而回十月至  
闕入對具言其狀上以措負國恩怒甚尚書朱勝  
非曰彼與金為鄰與中國隔海遠近利害甚明此

乃曩時待之太厚今安能責報右僕射黃潛善曰  
若以巨舟載精甲數萬徑造其國彼寧無懼乎勝  
非曰越海征伐燕之事可鑒也上怒始霽時開  
封尹宗澤亦請遣使通高麗令出兵攻賊十一月  
措遣其臣尹彥頤入使以禮館待遣回三年八月  
壬申上謂輔臣曰高麗入貢人使將至聞上皇遣  
內臣宮女各二人來朕聞之一則以喜一則以悲  
呂頤浩曰此必金人之意若非彼意此數人雖至  
高麗高麗必不肯令來於是乃詔止之詔略曰舉  
聚遭強敵之震驚既涉境以采深猶稱兵而未已  
茲移仗衛暫駐江湖如行使之果來恐有司之不  
戒俟休邊警當問聘期壞晉館以納車庶無後悔  
閉漢關而謝贊非用前規想彼素懷知吾本意注  
撰也紹興二年措遣其臣崔惟清等入貢上引見



答以溫詔遣回十二月明州言高麗使將到三年  
正月詔以法惠寺為同文館以待其至既而卒不  
至以入洋風敗舟為辭議者謂其設詐以侮我也  
六年持牒官金稚圭至明州朝廷懼其與金人為  
間詔賜銀帛遣之自是不至者二十餘年三十二  
年三月高麗綱首徐德榮詣明州言本國欲遣賀  
使守臣以聞侍御史吳芾言高麗與金接壤今兩  
國交兵其請可疑使其果來恐有意外貽笑夷狄  
詔止之時完顏亮將入寇也隆興二年四月明州  
言高麗入貢史不書引見日歷孝光寧三朝使命  
遂絕慶元間詔禁商人博易銅錢入高麗朝廷亦  
絕之也每麗人之入使也明越二郡困於供給騷

然不寧既至闕則館遇燕賓錫予之費以鉅萬計  
而饋其主者不預焉我使之行二神舟長大數倍  
戰船費不訾三節官吏糜爵捐廩皆仰縣官者甚  
夥蘇軾言于先朝謂高麗入貢有五害以此也惟  
是國於吳會與東都事體大異昔麗人之來率由  
登萊登萊距梁汴山河之限甚遠也今日三韓直  
趨四明四明距行都限一浙江爾雖自明而麗海  
道渺瀰中隔洲島凡海中之地大曰洲洲之小者  
曰島島之小者曰嶼隨其大小有千百十家之聚  
惟無草木而有石者曰礁而海深無際曰洋海舟  
之行觸礁則摧入洋則覆又有黑風海動之變遇  
之則天地晦冥波濤鼎沸故舟人每委曲避就出



急水門至郡山島始謂平達非數十日不至也然  
南北行各遇順風則歷險如夷揚應忱戊申之役  
其回也九月癸未發三韓戊子至明州之昌國縣  
僅六日耳海道之當防如此

按高麗之臣事中國也蓋欲慕華風而利  
歲賜耳中國之招來高麗也蓋欲柔遠入  
以飾太平耳國運中否強胡內侵則聘問  
之事可以已矣蕞爾島夷昔日蓋臣遼以  
自存者也金之強暴既滅遼而有之且荐  
食中華傾覆神京矣而謂高麗能禦之耶  
然則楊應忱之行甚無謂也欲倚以求成  
耶則彼豈能主宋人弭兵之盟欲倚以救

難耶則彼豈能效秦伯無衣之賦且當時  
所遣卑詞祈請之使如傅雱王倫之徒未  
嘗不得以自達於金也然我使之往也如  
石沉海彼兵之來也如火燎原卒不得其  
要領又何煩涉鯨波踐異境假道於三韓  
以求達耶然雱倫輩之奉使無益也不過  
徒為卑屈之辭而不能已其吞噬之謀耳  
燕雲距江淮數千里其間土地人民城郭  
固我之封疆以此衆戰犄角牽制彼亦未  
能保其長驅而必勝也若高麗奉命道應  
忱以往而金人有假道於虞之謀則揚帆  
直指吳會更無顧忌矣然則翟汝文所料



與王楷所以答使者之語皆忠言至計未  
可訾也朱丞相言彼與金為鄰與中國隔  
海遠近利害甚明此乃曩時待之太厚今  
安能責報此語固得之然政和之求醫而  
獻忠謀建炎之肅使而不奉詔則麗人固  
能報恩而未嘗負恩矣過乎此則難以責  
之也至於黃潛善之妄言繆計尤其可笑  
所謂精甲數萬既可襲高麗於海外胡為  
異時不能以此抗金人於維揚耶季布謂  
樊噲面諛可斬此語潛善可以當之

文獻通考卷三百二十五

文獻通考卷三百二十六

鄱陽馬端臨貴與著

四裔考

豆莫婁

豆莫婁國在勿吉北千里舊夫餘也室婁之東至  
海方二千餘里其人土著有居室倉庫多山陵廣  
澤於東夷之域最為平敞地宜五穀不生五果其  
人長大性強勇謹厚不寇抄其君長皆以六畜名  
官邑落有豪帥飲食亦用豆有麻布衣製類高麗  
而帽大其國大人以金銀飾之用刑嚴急殺人者  
死沒其家人為奴婢性淫尤惡妬者殺之尸於國  
南山上至腐或言穢貊之地也



百濟

百濟即後漢末夫餘王仇台之後馬韓五十四國  
百濟其一也初以百家濟因號百濟後漸強大兼  
諸小國晉時句驪既略有遼東百濟亦略有遼西  
晉平唐柳城北自晉以後吞併諸國擬有馬韓故  
地其國東西四百里南北九百里南接新羅北拒  
高麗千餘里西限大海處小海之南國西南海中  
有三島出黃漆樹似小棕樹而大六月取汁漆物  
器若黃金其光奪目自晉代受蕃爵自置百濟郡  
義熙中以百濟王夫餘腆為使持節百濟諸軍事  
宋齊並遣使朝貢授官封其人士著地多下濕率  
皆山居其都治建居拔城王號於羅瑕百姓呼為

韃吉支夏言並王也王妻號於陸夏言妃也官有

十六品曰左率曰恩率曰德率曰柰率曰扞率以上

冠飾將德紫帶施德皂帶固德赤帶季德青帶對德黃帶督皆

銀花武督左軍振武克虞皆白帶統兵以達率德率扞

率為之人庶及餘小城咸分隸焉其衣服男子略

同高麗拜謁之禮以兩手據地為敬婦人衣似袍

而袖微大在室者編髮盤於首後垂一道為飾出

婦者乃分為兩道馬兵有弓箭刀稍俗重騎射兼

愛墳史其秀異者頗解屬文又解陰陽五行用宋

元嘉曆以建寅月為歲首亦解醫藥卜筮占相之

術有投壺擲蒲等雜戲然尤尚奕碁僧尼寺塔甚

多而無道士賦稅以布絹麻米等婚娶之禮略同



華俗父母及夫死者三年持服餘親則葬訖除之  
氣候溫暖五穀雜果菜蔬及酒醴肴饌樂器之屬  
多同於內地唯無駝驢騾羊鵝鴨等云其王以四  
仲之月祭天又每歲祭四祠其始祖仇台之廟大  
姓有八族沙氏燕氏劬氏狹音解氏真氏國氏木氏  
昔氏音國西南人島居者十五所皆音城邑王餘  
映卒子餘毗立毗卒子慶代立慶卒子牟都立都  
卒子牟大立每王立必遣使詣江南請命俱授以  
鎮東大將軍都督百濟諸軍百濟亦遣使稱藩奉  
貢於魏尋為高麗所破衰弱累年遷居南韓地梁  
普通二年王餘隆復遣使奉表稱累破高麗今始  
與通好隆卒子明嗣北齊時亦通使焉齊亡遣使

通周隋開皇初遣使貢方物拜其王餘昌上開府  
帶方郡公百濟王平陳之歲奉表賀八年遣使入  
貢屬興遼東之役請為軍道帝厚其使遣之高麗  
頗知其事以兵侵其境餘昌卒子餘璋立大業時  
遣使入貢請討高麗煬帝許之命覘高麗動靜然  
餘璋內與高麗通和挾詐以闕中國後隋亂貢使  
遂絕唐武德四年王夫餘璋遣使入貢自是數朝  
貢且訟高麗梗道太宗貞觀初詔使者平其怨又  
與新羅世仇數相侵帝賜璽書和之然璋上表謝  
然兵亦不止璋卒子義慈立義慈事親孝與兄弟  
友時號海東曾子明年與高麗連和伐新羅取四  
十餘城發兵守之又謀取党項城絕貢道新羅告



急帝遣使齎詔書諭解聞帝新討高麗乃取新羅  
十城久之又奪十餘城因不朝貢高宗立乃遣使  
者來帝詔義慈曰海東三國開基舊矣地國犬牙  
比者隙爭侵校無寧歲新羅高城重鎮皆為王并  
歸窮於朕丐王歸地昔齊桓一諸侯尚存亡國况  
朕萬方主可不恤其危耶王所兼城宜還之新羅  
所俘亦俾還王不如詔者任王決戰朕將發契丹  
諸國度遼深入王毋後悔永徽六年新羅訴百濟  
高麗靺鞨取北境三十城顯慶五年乃詔左衛大  
將軍蘇定方等發新羅兵討之自城山濟海百濟  
守熊津口定方縱擊虜大敗王師乘潮帆以進趨  
真都城一舍上虜悉衆拒復破之斬首萬餘級拔

其城義慈挾太子隆走北鄙定方圍之次子泰自  
立為王率衆固守義慈孫文思曰王太子固在叔  
乃自王若唐兵解去如我父子何與左右縋而出  
民皆從之泰不能止定方令士超堞立幟泰開門  
降定方執義慈隆及小王演酋長五十八人送京  
師平其國五部三十七郡二百城戶七十六萬乃  
析置熊津馬韓東明金漣德安五都督府擢酋渠  
長治之命郎將劉仁願守百濟城左衛郎將王文  
度為熊津都督九月定方以所俘見詔釋不誅義  
慈病死贈衛尉卿許舊臣赴臨詔葬孫皓陳叔寶  
墓左授隆司稼卿文度濟海卒以劉仁軌代之璋  
從子福信嘗將兵乃與浮屠道琛擬周留城及迎



故王子夫餘豐於倭立為王西都皆應引兵圍仁  
願龍朔元年仁軌發新羅兵往救道琛立二壁熊  
津口仁軌與新羅兵夾擊之奔入壁爭梁墮溺者  
萬人新羅兵還道琛保仁孝城自稱領軍將軍福  
信稱霜岑將軍告仁軌曰問唐與新羅約破百濟  
無恙焉言殺之界以國我與其受死不若戰仁軌  
遣使齎書答說道琛倨甚館使者于外嫚報曰使  
人官小我臣大將禮不當見徒遺之仁軌以衆少  
乃休軍養威請合新羅圖之福信俄殺道琛并其  
兵豐不能制二年七月仁願等破之熊津拔支羅  
城夜薄真峴比明入之斬首八百級新羅餉道乃  
開仁願請濟師詔右威衛將軍孫仁師為熊津道

行軍總管發齊兵七千往福信顓國謀殺王豐率  
親信斬福信與高麗倭連和仁願已得齊兵士氣  
振乃與新羅王全法敏率步騎而遣劉仁軌率舟  
師自熊津江偕進趨周留城豐衆屯白江口四遇  
皆克火四百艘豐走不知所所在偽王子夫餘忠勝  
忠志率殘衆及倭人請命諸城皆復仁願勒軍還  
留仁軌代守帝以夫餘降為熊津都督俾歸國平  
新羅故憾招還遺人麟德二年與新羅王會熊津  
城刑白馬以盟辭曰往百濟先王罔顧逆順不敦  
鄰不睦親與高麗倭共侵削新羅破邑屠城天子  
怜百姓無辜命行人脩好先王負險恃遐侮慢弗  
恭皇赫斯怒是伐是夷但興亡繼絕主者通制故



立前太子隆為熊津都督守其祭祀附仗新羅長  
為與國結好除怨恭天子命永為藩服右威衛將  
軍魯城縣公公頤親臨厥盟有貳其德興師動衆  
明神監之百殃是降子孫不育社稷無守世世毋  
敢犯乃作金書鐵券藏新羅廟中仁願等還隆畏  
衆攜散亦歸京師儀鳳時進帶方郡王遣歸來是  
時新羅強隆不敢入舊國寄治高麗死武后又以  
其孫敬襲王而其地已為新羅渤海靺鞨所分百  
濟遂絕

### 新羅

新羅魏時新盧國焉其先本辰韓種也辰韓始有  
六國稍分為十二新羅其一也初曰新盧其國在

百濟東南五百餘里

亦在高麗東南兼有漢時樂浪郡之地

東濱大海

魏將毋丘儉討高麗破之奔沃沮其後復歸故國  
留者遂為新羅焉故其人雜有華夏高麗百濟之  
屬兼有沃沮不耐韓濊之地其王本百濟人自海  
逃入新羅遂王其國國小不能自通使聘符堅時  
其王樓寒遣使衛頭朝貢堅曰卿言海東之事與  
古不同何也答曰亦猶中國時代變革名號改易  
今焉得同梁武帝普通二年王姓慕名秦始皇使人  
隨百濟獻方物其俗呼城曰健牟羅其邑在內曰  
喙評在外曰邑勒亦中國之言郡縣也國有六喙  
評五十二邑勒土地肥美宜植五穀多桑麻果菜  
鳥獸物產略與華同至隋文帝時遣使來貢其王



姓金名真平

隋東蕃風俗記云金姓相承三十餘葉其王至今亦姓金按梁史云姓慕

未詳之由文帝拜為樂浪郡公新羅王其先附屬

於百濟後因百濟征高麗人不堪戎役相率歸之

遂至強盛因襲加羅任那諸國滅之並三韓地其西

北界犬牙出高麗百濟之間地多山險雖與百濟

構隙百濟不能圖之無文字刻木為信語言待百

濟而後通朝服尚白好祠山神八月望日大宴賚

官吏射其庭官以親屬為上其族第一骨第二骨

以自別兄弟女姑姨從姊妹皆聘為妻王族為第

一骨妻亦其族生子皆為第一骨不娶第二骨女

雖娶常為妾媵官有宰相侍中司農卿太府令凡

十有七等第二骨得為之事必與眾議號和自一

人異則罷宰相家不絕祿奴僮三千人甲兵牛馬

豬稱之畜牧海中山須食乃射息米穀於人償不

滿庸為奴婢王姓金貴人姓朴民無氏有名食用

柳杯若銅瓦元日相慶是日拜日月神男子褐袴

婦長襦見人必跪則以手据地為恭不粉黛率美

髮以繚首以珠綵飾之男子剪髮鬻冒以黑巾市

皆婦女貨販冬則作竈堂中夏以食置冰上畜無

羊少驢羸多馬馬雖高大不善行初百濟伐高麗

來請救悉兵往破之自是相攻不置後獲百濟王

殺之結怨滋深唐武德四年王真平遣使入朝後

三年拜柱國封樂浪郡王新羅王貞觀五年獻女

樂二詔歸之真平卒無子立女善德為王國人號



聖祖皇姑十七年為高麗百濟所攻使者來乞師  
會帝伐高麗詔率兵犄角善德使兵五萬入高麗  
南鄙拔水口城以聞善德卒妹真德襲王明年遣  
子文王弟子春秋等來朝因請改章服從中國制  
內出珎服賜之又詣國學觀釋奠講論高宗永徽  
元年攻百濟破之遣春秋子法敏入朝真德織錦  
為頌以獻曰臣唐開洪業巍巍皇猷昌止戈成天  
定興文經百王統天崇雨施治物體含章深仁諧  
日月撫運邁時康幡旗既赫赫鉦鼓何鏗鏗外夷  
違命者剪覆被天殃淳風凝幽顯遐邇競呈祥四  
時和玉燭七耀巡萬方維岳降宰輔維帝任忠良  
五五成一德照我唐家唐帝美其意擢法敏太府

卿五年真德死帝與發哀贈開府儀同三司賜綵段  
三百遣使吊祭以春秋襲王明年百濟高麗靺鞨  
共伐取其三十城使者來請救帝命蘇定方討之  
以春秋為岬夷道行軍總管遂平百濟龍朔元年  
死法敏襲王以其國為雞林州大都督府授法敏  
都督咸亨五年納高麗叛略百濟地守之帝怒詔  
削官爵以其弟右驍衛大將軍仁問為新羅王自  
京師歸國詔劉仁軌等發兵討之上元二年二月  
仁軌破其衆於七重城以靺鞨兵浮海略南境斬  
獲甚衆詔李謹行為安東鎮撫大使屯買肖城三  
戰虜皆北法敏遣使入朝謝罪貢篚相望仁問乃  
還辭王詔復法敏官爵然多取百濟地遂抵高麗



南境矣置尚良康熊全武漢朔漠九州州有都督  
統郡十或二十郡有太守縣有小守開耀元年死  
子政明襲王遣使者朝可唐禮及佗文辭武后賜  
吉凶禮及文詞五十篇死子理洪殷王死弟興光  
襲王玄宗開元中數入朝獻果下馬朝霞紬魚牙  
紬海豹皮又獻二女帝曰女皆王姑姊妹違本俗  
別所親朕不忍留厚賜還之又遣子弟入太學學  
經術帝間賜興光瑞文錦五色羅紫繡紋袍金銀  
精器興光亦上異狗馬黃金美髯諸物初渤海靺  
鞨掠登州興光擊走之帝進興光寧海軍大使使  
攻靺鞨二十五年死帝尤悼之贈太子太保命使  
吊祭子承慶襲王邢璣往使帝詔璣曰新羅號君

子國知詩書以卿惇儒故持節往宜演經誼使知  
大國之盛又冊其妻朴為妃承慶死詔使者吊臨  
以其弟憲英嗣王帝在蜀遣使沂江至成都朝正  
月大曆初憲英死子乾運立甫卅遣金隱居入朝  
待命詔遣使吊祭冊命之會其宰相爭權相攻國  
大亂三歲乃定於是歲朝獻建中四年死國人共  
立宰相金良相嗣貞元元年遣使持節命之是年  
死立良相從父弟敬信襲王十四年死無子立嫡  
孫俊邕明年遣使持冊未至而邕死子重興立永  
貞元年遣使冊命後三年使者金力奇來謝且言  
往歲冊故主俊邕為王母申太妃妻叔妃而俊邕  
不幸冊今留省中臣請授以歸又為其宰相及王



之弟巧門戟詔皆可凡再朝貢七年死彥昇立來  
告喪遣使吊且冊命新王及妃長慶寶曆間再遣  
使者來朝留宿衛彥昇死子景微立太和五年遣  
使冊吊如儀開成初遣子義琮謝頤留衛見聰明  
年遣之五年鴻臚寺籍質子及學生歲滿者一百  
五人皆還之有張保臯鄭年者皆善鬪戰工用槍  
年復能沒海履其地五十里不噎其勇健保臯不  
及也年以兄呼保臯保臯以齒年以藝常不相下  
自其國皆來為武寧軍小將後保臯歸新羅謁其  
王曰遍中國人以新羅為奴婢願得鎮清海使賊  
不得掠入西去清海海路之要王與保臯萬人守  
之自太和後海上無鬻新羅人者保臯既貴於其

國年飢寒客連水一日謂戊主馮元規曰我欲東  
歸乞食於張保臯元規曰若與保臯所負何如柰  
何取死其手年曰飢寒死不如兵死快况死故鄉  
耶年遂去至謁保臯保臯飲之極歡會聞大臣殺  
其王國亂無主保臯分兵五千人與年持年泣曰  
非子不能平禍難年至其國誅反者立王以報王  
遂召保臯為相以年代守清海會昌後朝貢不復  
至後唐同光元年王金朴英遣使來朝貢長興四  
年權知國事金溥遣使來朴英溥世次卒立史皆  
失紀自晉以後不復至

沃沮

東沃在高句麗蓋馬大山之東濱大海而居其地



形東北狹西南長可千里北與挹婁夫餘南與濊  
貊接戶五千無大君王世世邑落各有長帥其言  
語與句麗大同時時小異漢初燕亡人衛滿三朝  
鮮時沃沮皆屬焉漢武帝元封三年伐朝鮮殺滿  
孫右渠分其地為四郡以沃沮城為四郡郡後為  
夷貊所侵徙郡句麗西北今所謂玄菟故府是也  
沃沮還屬樂浪漢以土地廣遠在單單大領之東  
分置東部都尉治不耐城別主領東七縣時沃沮  
亦皆為縣漢光武六年省邊郡都尉由此罷其後  
皆以其縣中渠帥為縣侯不耐爭麗沃沮諸縣皆  
為侯國夷狄更相攻伐唯不耐濊侯至今猶置功  
曹主簿諸曹皆濊民作之沃沮諸邑落渠帥皆自

稱三老則故縣國之制也國小迫於大國之間遂  
臣屬句驪句驪復置其中大人為使者使相主領  
又使大加統責其租稅貊布魚鹽海中食物千里  
擔負致之又送其姜女以為婢妾遇之如奴僕其  
土地肥美背山向海宜五穀善田種人性質直強  
勇少牛馬便持矛步戰食飲居處衣服禮節有似  
句麗其葬作大木槨長十餘丈開一頭作戶新死  
者皆假埋之才使覆形皮肉盡乃取骨置槨中舉  
家皆共一槨刻木如生形隨死者為數又有瓦鏹  
置米其中編縣之於槨戶邊魏毋丘儉討句麗句  
麗王宮走沃沮遂進師擊之沃沮邑落皆破之斬  
獲首虜三千餘級宮奔北沃沮北沃沮一名置隔



婁去南沃沮八百餘里其俗南北皆同與挹婁接  
挹婁喜乘船寇抄北沃沮畏之夏月恒在山岩深  
穴中為守備冬月冰凍船道不通乃下居村落王  
順別遣追討官盡其東界問其耆老海東復有人  
不耆老言國人嘗乘船捕魚遭風見吹數十日得  
一島上有入言語不相曉其俗常以七月取童女  
沉海又言有一國亦在海中純女無男又說得一  
布衣從海中浮出其身如國人衣其兩袖長三丈  
又得一破船隨出在海岸邊有一人項中復有面  
生得之與語不相通不食而死其域皆在沃沮東

大海中

挹婁

挹婁云即古肅慎之國也周武王及成王時皆貢  
楛矢石砮爾後千餘年雖秦漢之盛不能致也魏  
常道鄉公景元末來貢獻楛矢石砮弓甲貂皮之  
屬其國在不咸山北在夫餘東北千餘里濱大海  
南與北沃沮接不知其北所極廣袤數千里土地  
多山險車馬不通人形似夫餘而言語各異有五  
穀牛馬麻布出赤玉好貂無君長其邑落各有大  
人處於山林之間土氣極寒常為穴居以深為貴  
大家接至九梯好養豕食其肉衣其皮冬以豕膏  
塗身厚數分以禦風寒夏則裸袒以尺布蔽其前  
後其人臭穢不潔作廁於中園之而居無文墨以  
言語為約坐則箕倨以足挾肉啖之得凍肉坐其



上令溫暖土無鹽鐵燒木作灰灌之取汁而食俗  
皆編髮將嫁娶男以毛羽挿女頭女和則持歸然  
後致禮聘之婦貞而女淫貴壯而賤老死者其日  
即葬之於野交木作小椁殺豬積其上以為死者  
之粮性凶悍以無憂哀相尚父母死男女不哭泣  
有哭者謂之不壯相盜竊無多少皆殺之雖野處  
而不相犯有石砮皮骨之甲國東北有山出石其  
利入鐵將取之必先祈神其人衆雖少而多勇力  
處山險又善射弓長四尺力如弩矢用楛長尺八  
寸青石為鏃鏃皆施毒中人即死隣國畏其弓矢  
卒不能服也便乘船好寇盜隣國患之東夷飲食  
類皆用俎豆惟挹婁獨無法俗最無綱紀晉元帝

初又詣江左貢其石砮至成帝時通貢於石虎四  
年方達虎問之荅曰每候牛馬向西南卧者三年  
矣是知有大國所在故來焉

勿吉 黑水靺鞨

勿吉國在高麗北一日靺鞨邑落各有長不相總  
一其人勁悍於東夷最強言語獨異常輕立莫婁  
等國諸國亦患之去洛陽五千里自和龍北二百  
餘里有善玉山北行三十日至祁黎山又北行七  
日至洛瓌水水廣里餘又北行十五日至太岳魯  
水又東北行十八日到其國國有大水闊三里餘  
名速末水其部類凡有七種其一號栗末部與高  
麗接勝兵數千多驍武每寇高麗其二伯咄部在



栗末北勝兵七千其三安車骨部在伯咄東北其  
四拂涅部在伯咄東其五號室部在拂涅東其六  
黑水部在安車西北其七白山部在栗末東南勝  
兵並不過三千而黑水部尤為勁健自拂涅以東  
矢皆石鏃即古肅慎氏也東夷中為強國所居多  
依山水渠帥曰大莫弗瞞咄國南有從太山者華  
言太皇俗甚敬畏之人不得山上洩汗行經山者  
以物盛去上有熊羆豹狼皆不害人入亦不敢殺  
也地卑濕築土如堤鑿穴以居開口向上以梯出  
入其國無牛有馬車則步推相與偶耕土多粟麥  
糝菜則有葵水氣鹹生鹽於木皮之上亦有鹽池  
其畜多豬無羊嚼米為酒飲之亦醉婚嫁婦入服

布裙男子衣豬皮裘頭插虎豹尾俗以溺洗手面  
於諸夷最為不潔初婚之夕男就女家執女乳其  
妻外淫人有告其夫夫輒殺妻而後悔必殺告者  
由是姦淫事終不發人皆善射以射獵為業角弓  
長三尺箭長尺二寸常以七八月造毒藥傳矢以  
射禽獸中者立死復毒藥氣亦能殺人其父母春  
夏死亡埋之冢上作屋令不雨濕若秋冬死以其  
尸餌貂貂食其肉則多得之魏孝文延興中遣乙  
力支朝獻太和初又貢馬五百疋乙力支稱初發  
其國乘船溯難河西上至大冷河沉船於水南出  
陸行度洛孤水從契丹西界達和龍自云其國先  
破高句麗十落密共百濟謀從水道并力取高麗



遣乙力支奉使大國謀其可否詔敕三國同是藩  
附宜共和順勿相侵擾乙力支乃還從其來道取  
得本船泛達其國九年復遣使僕尼支朝明年復  
入貢其傍有大莫盧國覆鐘國莫多回國庫婁國  
素和國具弗伏國匹黎國拔大何國都羽陵國庫  
伏真國魯婁國羽真倭國前後各遣使朝獻太和  
十三年勿吉復遣使貢楛矢方物於京師七年又  
遣使人婆非等五百餘人朝貢景明四年復遣使  
僕力歸朝貢自此迄于正光貢使相尋爾後中國  
紛擾頗或不至延興二年六月遣使貢方物至齊  
朝貢不絕隋開皇初相率遣使貢獻文帝詔其使  
曰朕聞彼土人勇今來實副朕懷視爾等如子爾

宜敬朕如父對曰臣等僻處一方聞內國有聖人  
故來朝拜既親奉聖顏願長為奴僕其國西北與  
契丹接每相劫掠後因其使來文帝誠之使勿相  
攻擊使者謝罪帝厚勞之令宴飲於前使者與其  
徒皆起舞曲折多戰鬪容上顧謂侍臣曰天地間  
乃有此物常作用兵意然其國與隋懸隔唯粟末  
白山為近煬帝初與高麗戰頻敗其衆渠帥突地  
稽率其部降拜右光祿大夫居之柳城與邊人來  
往悅中國風請被冠帶帝嘉之賜以錦綺而褒寵  
之及遼東之役突地稽率其徒以從每有戰功賞  
賜甚厚十三年從幸江都放還柳城李密遣兵邀  
之僅而得免至高陽沒於王須拔未幾遁歸羅藝



唐武德五年渠長阿固郎始來太宗貞觀二年乃  
臣附所獻有常以其地為燕州帝伐高麗其北部  
反與高麗合高麗真等率衆援安市每戰靺鞨常  
居前帝破安市執惠真奴靺鞨兵三千餘悉坑之  
開元十年其酋倪厲利稽來朝玄宗即拜勃利州  
刺史於是安東都護薛泰請置黑水府以部長為  
都督刺史朝廷為置長史監之賜府都督姓李氏  
名曰獻誠以雲麾將軍領黑水經略使隸幽州都  
督訖帝世朝獻者十三大曆世凡七貞元一來元  
和中再初黑水西北又有思慕部益北行十日得  
郡利部東北行十日得窟說部亦號窟說稍東南  
行十日得莫曳皆部又有拂涅虞婁越喜鐵利等

部其地面距渤海北東際於海西抵室韋南北袤  
二千里東西千里拂涅鐵利虞婁越喜時時通中  
國而郡利屈設莫曳皆不能自通今存其朝京師  
者附左方拂涅亦稱大拂涅開元天寶間八來獻  
鯨睛貂鼠白兔鐵利開元中六來越喜七來貞元  
中一來虞婁貞觀間再來貞元一來後渤海盛靺  
鞨皆役屬之不復與王會矣後唐同光二年黑水  
兀兒遣使來其後常來朝貢自登州泛海出青州  
明年黑水胡獨鹿亦遣使來兀兒胡獨鹿若其兩  
部酋長各以使來而其部族世次立卒史皆失其  
紀至長興三年胡獨鹿死子桃李花立嘗請中國  
後不復見云



渤海

渤海本粟末靺鞨附高麗者姓大氏高麗滅率衆保挹婁之東牟山地直營州東二千里南北新羅以泥河為境東窮海西契丹築城郭以居高麗通殘稍歸之唐萬歲通天中契丹盡忠殺營州都督趙翽反有舍利乞乞仲象者與靺鞨酋乞乞比羽及高麗餘種東走渡遼水保太白山之東北沮奧婁河樹壁自固武后封乞乞比羽為許國公乞乞仲象為震國公赦其罪比羽不受命后詔將軍李楷固等擊斬之時仲象已死其子祚榮引殘彘遁去楷固窮躡度天門嶺祚榮因高麗靺鞨兵拒楷固楷固敗還於是契丹附突厥王師道絕不克討

祚榮節并比羽之衆恃荒遠乃建國自號震國王遣使交突厥地方五千里戶十餘萬勝兵數萬頗知書契盡得夫餘沃沮弁韓朝鮮海北諸國中宗時使侍御史張行岌招慰祚榮遣子入侍睿宗先天中遣使拜祚榮為左驍衛大將軍渤海郡王以所統為忽汗州都督自是始去靺鞨號專稱渤海玄宗開元七年祚榮死其國私謚為高王子武藝立斥大土宇東北諸夷畏臣之私改年曰仁安帝賜典冊襲王并所領未幾黑水靺鞨使者入朝帝以其地建黑水州置長史臨總武藝召其下謀曰黑水始假道於我與唐通異時請吐屯於突厥皆先告我今請唐官不吾告是必與唐腹背攻我也



乃遣弟門藝及舅任雅相發兵擊黑水門藝嘗質  
京師知利害謂武藝曰黑水請吏而我擊之是背  
唐也唐大國兵萬倍我與之產怨我且亡昔高麗  
盛時士三十萬抗唐為敵可謂雄強唐兵一臨掃  
地盡矣今我衆比高麗三之一王將違之不可武  
藝不從兵至境又以書固諫武藝怒遣從兄壹夏  
代將召門藝將殺之門藝懼僥路自歸詔拜左驍  
衛將軍武藝使使暴門藝罪惡請誅之有詔處之  
安西好報曰門藝窮來歸我誼不可殺已投之惡  
死地并留使者不遣別詔鴻臚少卿李道邃源諭  
旨武藝知之上書斥言陛下不當以妄示天下意  
必殺門藝帝怒道邃復漏言國事皆左除而陽斥

門藝以報後十年武藝遣大將張文休率海賊攻  
登州帝馳遣門藝發幽州兵擊之使太僕卿全思  
蘭使新羅督兵攻其南會大寒雪衰丈士凍死過  
半無功而還武藝望其弟不已募客入東都狙刺  
於道門藝格之得不死河南捕刺客悉殺之武藝  
死其國私謚武王子欽茂立改元大興有詔嗣王  
及所領欽茂因是赦境內天寶末欽茂徙上京直  
舊國三百里忽汗河之東訖帝世朝獻者二十九  
寶應元年詔以渤海為國欽茂王之進檢校太尉  
大曆中二十五來以日本舞女十一獻諸朝貞元  
時東南徙東京欽茂死私謚文王子宏臨早死族  
弟元義立一歲猜虐國人殺之推宏臨子華璵為



王復還上京改年中興死謚成王欽茂少子嵩鄰  
立改元正歷有詔授右驍衛大將軍嗣王建中貞  
元間凡四來死謚康王子元瑜立改元永德死謚  
定王弟言義立改年朱雀並襲王如故事死謚僖  
王弟明忠立改年太始立一歲死謚簡三從父仁  
秀立改年建興其四世祖野野勃祚榮弟也仁秀  
頗能討伐海北諸部開大境宇有功詔檢校司空  
襲王元和中凡十六朝獻長慶四寶曆凡再大和  
四年仁秀死謚宣王子新德蚤死孫彝震立改年  
咸和明年詔襲爵終文宗世來朝十二會昌凡四  
彝震死弟虔晃立死玄錫立咸通時三朝獻初其  
王數遣諸生詣京師太學習識古今制度至是遂

為海東盛國地有五京十五府六十二州以肅慎  
故地為上京曰龍泉府領龍湖渤三州其南為中  
京曰顯德府領盧顯鐵湯榮興六州獫狁故地為  
東京曰龍原府亦曰柵城府領慶鹽穆賀四州沃  
沮故地為南京曰南海府領沃晴椒三州高麗故  
地為西京曰鴨綠府領神栢豐正四州曰長領府領  
瑕河二州夫餘故地為夫餘府常屯勁兵捍契丹  
領扶仙二州鄭頡府領鄭高二州挹故地為定理  
府領定瀋二州安邊府領安瓊二州率賓府領華  
益建三州拂涅故地為東平府領伊蒙沱黑比五  
州鐵利府領廣汾蒲海義歸六州越喜故地為懷  
遠府領達越懷紀富美福邪芝九州安遠府領寧



郿慕常四州又郿銅涑三州為獨奏州涑州以其  
近涑沫江蓋所謂粟末水也龍原東南瀕海日本  
道也南海新羅道也鴨綠朝貢道也長領榮州道  
也夫餘契丹道也俗謂王曰可毒夫曰聖主曰基  
下其命為教王之父曰老王母太妃妻貴妃長子  
曰副王諸子曰王子官有宣詔省中臺省政堂省  
有左右相左右平章侍中常侍諫議又有左六司  
忠仁義部右六司智禮信部各有郎中員外又有  
武負左右衛大將軍之屬大抵憲象中國之度服  
章亦有紫緋淺緋綠及牙笏金銀魚之制餘俗與  
高麗丹略等幽州節度府與相聘問自營平距  
京師蓋八千里而遠梁開平元年王大誣譔遣王

子來貢方物二年三年及乾化二年俱遣使來貢  
後唐同光二年遣王來朝又遣姪學堂親衛大元  
謙試國子監丞三年及天成元年俱遣使入貢進  
兒口女口先是契丹大首領邪律阿保機兵力雄  
盛東北諸蕃多臣屬之以渤海土地相接常有吞  
併之志是歲率諸蕃部攻渤海國夫餘城下之改  
夫餘城為東丹府命其子突欲留兵鎮之未幾阿  
保機死命其弟率兵攻夫餘城不克而還四年及  
長興二年三年四年清泰二年三年俱遣使貢方  
物周顯德元年渤海國烏思羅等三十人歸化其  
後隔絕不通宋太平興國四年太宗平晉陽移兵  
幽州其酋帥大鸞河率小校李勳等十六人部族



三百騎來降以鸞河為渤海都指揮使六年賜烏  
舍城浮渝府渤海琰府王詔略曰蠢茲北戎犯我  
封略今欲鼓行深入大殲醜類素聞爾國密邇寇  
讐勢迫併吞力不能制因而服屬困於宰割當靈  
旗破虜之際是隣邦雪憤之日所宜盡出族帳佐  
予兵鋒俟其剪滅沛然封賞幽薊土宇復歸中朝  
朔漠之外悉以相與勗乃協力朕不食言時將率  
兵大舉北伐故降是詔

蝦夷

蝦夷海島中小國也其使鬚長四尺尤善弓矢挿  
箭於首令人載之而立數十步無不中者唐顯慶  
四年十月隨倭國使至入朝

文獻通考卷三百二十六



